



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :

Tir Yimym

tiryimym@aolima

tir yimym

TAPAK 3

Saif Gaddafi election nung tokteptsü metemsü: Election Commission

Nüburtem tenzüksü atema TMC nung aden: Mukul Sangma



VOL. XIX NO. 449 (ADOK 449) DIMAPUR ROGONÜ (FRIDAY) YIMPOKSÜ (NOVEMBER) 26, 2021

₹ 5.00

## Sorkari bill asem aser pangzüng ana benok

**Kohima, Yimpoksi/Nov. 25 (TYO):** State Assembly ananü winter session Brehostibarnü tenzüksü mapang Nagaland sorkari bill asem aser pangzüng (resolution) ana benoka liasü.

Iba session ya tesüiba mapang dang nung balaka lir, kechaiser August 16 nü Nagaland United Government tenteta aser iba sülen September 18 nü United Democratic Alliance melener 13th Nagaland Legislative Assembly nung opposition züngsem maliba session mezüngbuba alitsü.

Züngsem 60 aliba House nungya Nationalist Democratic Progressive Party (NDPP) nungi 21, Bharatiya Janata Party (BJP) nungi 12, Naga People's Front (NPF) nungi 25 aser Independent nungi ana lir.

House nung Chief Minister Neiphiu Rio-i bill asem benokba ya The Nagaland Fiscal Responsibility and Budget Management (Fourth Amendment) Bill, 2021, The Nagaland Goods and Services Tax (Fifth Amendment) Bill, 2021 aser Nagaland Lokayukta (Second Amendment) Bill, 2021 alitsü.

Minister, Health and Family Welfare, S Pangnyu Phom ajanga "The Transplantation of Human Organ Act 1994 and Transplantation of Human Organ Act (Amendment) 2011" nung sorkar indang pangzüng mezüngbuba benoka liasü.

## BAN-i Jt. Secretary, MSME den sensaksem sentong ka agi

**Dimapur, Yimpoksi/Nov. 25 (TYO):** Business Association of Nagas (BAN) ajanga Mercy Epao, Jt. Secretary, MSME aser Banker tem densema sorkar institution balala nungi teshimtet nübüttem den Interactive session cum Dinner sentong ka ayongzüka agia liasü.

Iba sentong nung BAN ajanga Jt. Secretary, MSME nem special representation ka agütsüba nung Director post kübok MSME Nagaland inakyim nung ministry teka aitsü mepishia aser tazüng aliba post (Ministerial & Technical) ajanga nung nübu shimoktsü shia liasü.

Parnokisa MSME atema Mineral and Food Testing Lab, One District One Product (ODOP model) nung ajemdaker Skill Development agütsütsü atema district ajak nung Centre of Nagaland Tool Room and Training Centre (NTTC) amenoktsü aser scheme balala inyaka MSME Entrepreneurs tem ajangzüksü atema Nagaland nung NSIC office amenoktsü asoshi parnokki zülua liasü.

BAN ajanga production process kisüng nung masü saka tejaklen-tesülen sendaktepa jenjang ajak nung entrepreneurial ecosystem tajung adokdaksüba nung shilem tulu agütsü, ta Mercy Epao Jt. Secretary, MSME ajanga ashi.

Laisa India ya 5 Trillion US dollar economy kumdaksüba nung MSMEs temi shilem tulu agütsü Government of India nükla indanga lemsatepa liasü.

MSME sector ajanga manufacturing aser service sector nung employment crore 11 adokdaksügo. Business tezüpaba nung inyaksü aser maparen tekeraba nung inyaktetsü mechi ministry of MSME kübok scheme timba state sorkar majangi entrepreneur tem tajungba nung yarir, ta lai ashi.

Laisa state nung aliba tentet balala dang tongti shilem agütsü aser

Iba pangzüng benoka jembiba mapang, 1994 aser 2011 Acts tem indang Section (1) indang Sub-Section (3) nung Constitution of India kübok iba Act adopt asüba state tem nung adopt asüba anogo nungi mapa kuma inyaka aotsü shia lir, ta Minister Pangnyu-i ashi.

Nisung temang shilem transplant asüba melatsü atema Nagaland nung iba Act ana ya adopt asütsü nüngdak, ta pai ashi.

Chief Minister Rio ajanga Securitisation and Reconstruction of Financial Assets and Enforcement of Security Interest (SARFAESI) Act, 2002 indang pangzüng benoka liasü.

SARFAESI Act ya Nagaland and Revenue Regulations (Amendment) Act, 2002 den medemdanga mapa kuma inyaka agency tem nem tali tejangjaba agütsütsü asoshi iba pangzüng ya yanglu, ta pai ashi.

Bill, resolutions aser supplementary demand tem jembitsü, asadangtsü aser vote agütsü maparen Hokulbarnü inyaksü, ta Nagaland Assembly Speaker Sharingain Longkumer-i ashi.

Senden tenzükdang Speaker-i taoba mapang legislator inyaka alir nisung pungo asüba indang asükhu lemsatep aser akum agütsü liasü. Par pungo ya Pongchailenba Konyak, Chupfuo Kense, Lhiweshiolo Mero, Kihoto Hollohon aser Khuosatho Nyusou alitsü.

kati ka renlokba nung yariteptsü, kati ka den amalitep akatsü aser yariteptsü ajungshia liasü.

Region nung entrepreneurs tem yaritsü atema Ministry of MSME ajanga NER nem temolung agütsü arur, aser MSME kübok Entrepreneurs tem yaritsü atema sen crore 50,000 venture fund yanglutsü ministry nükjidong lir.

Abhinash Hembrom, AGM, SBI ajanga iba sentong nung jembiba mapang, tesüiba ita ishika par office-i BAN den lungjemer inyaka arur aser ita ishika tsüngta lungjemer inyakba nung temelenshi angutsü imlar, ta ashi.

NIDC ya Term Loan facility kisüng agütsü aliba nungi infrastructure loan tem dena agütsütsü inyakteper, anungji Entrepreneurs temi Special Economic Zone (SEZ) nung tetsüng ajemoktsü aser processing unit tem amenoktsü asoshi mera agütsü, ta Temjenyanger Jamir, DGM, NIDC ajanga ashi.

NeDFI tenüng nung Jianthai Lung Kamei aden aser pai küm nung sen tetemlok shilem 7 aliba scheme tasen tenzüksü aliba indang lemsatep aser Entrepreneurs tejanga jangjatetba nung BAN den külemi inyaksü jangra aliba shia liasü.

Nagaland ya shilem 71 bo rural area küboki aiter asünung, aluyimba yagi kangasa tongtipang shilem agir, ta Tiakala Ao, GM, NABARD ajanga ashi aser Nagaland nung Co-operative society 7000 dak tema register süa lir aser item ya timba kibong ka nungi dang lir aser züngsem 10-15 dang alir, saka danga state tem nungbo Co-operative society ka nung züngsem 1000 dak tema alir, anungji züngsem tali-i shilem agütsü aser meranga inyaksü, ta lai ashi.

State Director, KVIC, I. Athuba Lusang ajanga Khadi & Village Industries inyaksangshi indang lemsatepa liasü.

## Nagaland nung sorkar tesayur talila meyirejang 10 lir: CM Rio



Chief Minister Neiphiu Rio-i NLA Secretariat, Kohima nung November 25, 2021 nü 13th Nagaland Legislative Assembly indang Session 9 buba nung jembidang tangokba noksa ka yangi angur.

**Kohima, Yimpoksi/November 24 (TYO):** Nagaland Legislative Assembly (NLA) nung tanü, mapatem nung nisung tasen shimoktsü atema tenokdangba agütsüba küboki School Education Department maidaktsütsü, aser taruba academic session nungibo sorkar school tem tesayurtem ajak abensa inyaksangshi tenzükdaktsütsü nüngdakba lemsatepa liasü.

State Assembly winter session mezüngbuba anogo question hour mapang legislator temi iba tebilemba ya lemsatepa liasü.

Chief Minister Neiphiu Rio-i, kaketshir aser tesayur ratio ji 10:1 lir, koba linük ajanga nung 30:1 lir. Nagaland nung ration ji kanga tajung saka math aser science amala subject tem atema subject tesayurtem agi anünger, ta ashi.

"Nagaland nung sorkar tesayur 10,000 shi talila lir, anungji tesayur agi anünger ken o kecha mali aser tesayurtem lemshiba inyakyim tenzükgogo," ta pai ashi.

Tesayur agi manünger saka

tenüngdakba apir tesayurtem subject ka asoshi shimba ya nüngdakba ama masü, ta paisa shisem.

Pai, taoba mapang SSA/RMSA tesayurtem shimba mapang aibelen ka mena, aser parnokki longkak aitba, koba lokti tentetba balalai pusema liasü, iba sülen CCS aginaka parnok regularize sütsü, ta ashi.

School kar nungbo kaketshirtem mali saka tesayurtembo lir aser kasa mapang nung school kar nungbo kaketshirtem dang nungi tesayurtem timba lir, ta Rio-i ashi.

Rio-i, COVID-19 wara poktetba ajanga sorkari mapa nung nisung shimokba inyakyim sota ata, saka tensa tajungba kümer asünung tenokdangba aginogo, ta metetdaksü.

Ajüsüka pai ashiba agi, Naga Students' Federation (NSF)-i Nagaland Service Selection Board (NSSB)-i interview magi tashibo nisung shimoktsü atema departmental interview kecha magütsü akhanger. NSSB inyakyimbo tenzükgogo ajüsüka Eastern Naga Students'

Federation (ENSF)-i ENPO area nem menden 45 memekazüksüra interview magütsüla ta akhanba ajanga maparen bangdaka lir.

Iba tsüngda nung nisung kari okadak ken o benok aser okadak ajanga mapa nung nisung shinga meshimoktsü atema tenokdangba agütsü aser iba ajanga sorkar tanü tashi kangshidar, ta pai ashi.

Anungji Rio-i, iba ken o bentettsü atema mapang tera meshizükba den court dang iba tenokdangba ya agütsütsü mepeshia asüngdangogo.

Kaketshirtem maliba school mesera result nil asüba school tem lokteptsü atema inyakyim tenzükgogo, ta ashiba den pai züngsemtem dang tanurtem shisaliok atema tasa ka benoktsü asoshi teka amteper inyaksü mepeshia metetdaksü.

Senden nung NPF MLA Yitachu-i, COVID-19 wara poktetba ajanga küm ana tsüngda kaketshirtem aser talisa yimdak yimtsüng nung alirtem dak kanga mejungi kongshio, aser academic session tasenba atema renemshitsü asoshi tang mapang lir, ta ashi.

Paisa, primary section dak kanga temulung agütsütsüla aser primary section nung shisaliok shidak agütsütsü atema tesayurtem peria shimtsü asoshi temelaba agütsütsüji kanga tongtibang ta ashi.

Mapa nung nisung anioxtsü atema School Education Department nembo temelaba agütsütsüla, ta Yitachu-i ashi. Paisa, House lenir Rio dang mapa tazüng alibattem ajak süngtsütsü aser primary school temi tesayurtem teperi yoktsü mepeshia.

(Maneni tapak 2 nung...)

## NLA nung Tizu-Zungki Inland Waterways indang jembiba

**Kohima, Yimpoksi/Nov. 25 (TYO):** Brehostibarnü opposition maliba Nagaland Legislative Assembly nung tekeratiba nung Tizu-Zungki Inland Waterways mapa kuma aotsü indang jembiba liasü.

March 26, 2016 nung National Waterway Act ajanga melaba ama Tizu-Zungki ayong ya National Waterways-101 sangdonga liasü aser iba ayong ya Inland Waterway corridor ka ama yanglutsü nükjidong nung state sorkari Indian Waterways Authority of India (IWAI) dang Detailed Project Report (DPR) renemtsü mepishia liasü, ta Minister Transport, P Paiwang Konyak-i House nung metetdaksü.

Yamaji IWAI ajanga M/s WAPCOS nem DPR yanglutsü nungloktsü aser Inland Water Transport (IWT) atema Central Sector Scheme (CSS) totuyuba nung DPR renema liasü, ta pai ashi.

DPR nung iba project ya phase asem lemsar inyaksü lir, ta pai ashi.

IWAI ajanga mepishiba ama Nagaland sorkari telemtetba agia IWAI dang iba project ya Nagaland Inland Waters Board (NIWB) ajanga inyaksü osang

agütsü. NIWB ya taküm August 6 nü tenteta liasü.

Transport department ajanga Ministry of Ports, Shipping and Waterways dang iba project phase mezüngbuba tekeraba nung inyak tenzüksü asoshi nüngdakba senotsü agütsütsü mepishia asüngdangogo, aser Ministry ajanga senotsü agütsüba sülen project ya NWIB ajanga inyaksü, ta pai ashi.

Iba Inland Waterways ya South East Asia linüktem den sendaktepba lenmang ka asütsü, koba state rongsenketzüng renoktsü, employment maangka tali adoktsü aser terenlok maparen atema kanga tongtipang lir, ta Minister Paiwang-i ashi.

Iba tzu lenmang ya shidak yangluteta aoba sülen Phek aser Kiphire district tem nung granite, marble aser limestone aika aliba ya bushiteta rongsenketzüng ajungkettsü atema danga linüktemi bener otettsü, ta pai ashi.

Pai tawa Union Minister den ajurutepba indang House nung lemsatepba mapang, department-i renemba DPR ya kanga tulu lir ta Union Minister-i ashi aser state dang phase asem lemsar mapa inyaksü aliba ya tongtipangtiba mapa mezüng phase nung inyak

tenzüksü atema proposal agüjang ta ashi.

NPF Legislature Party leader aser taoba chief minister T R Zeliang-ia iba maparen ya 2015-16 mapang benoka liasü aser joko küm aika süyio, ta ashi aser department dang tzu lenmang ya kanga tongtipang ta angatetsüla, ta ashi.

Nagaland nung railway station ka dang, aji Dimapur nung lir aser railway yagi state nung tesem kar nung dang kongshir aser iba yongji Nagaland ya ajungalen alinük agi müketbanger aliba state ka akumer, ta pai ashi.

Anungji Myanmar tsütsü lenmang tasen lapoktsü kanga tongtipang lir, anungji minister-i department anir iba teblemetsü süoki ia agütsüla, kechiaser transport system ajak dang tzu lenmang ya talangba lir, ta pai ashi.

Minister Paiwang-isa tang teinyakdak Dimapur-Zubza railway ua Zubza nung metembang Kohima tashi atutsü mepishio, kechiaser Zubza aser Kohima tsüngta kilometre 10 dang lir, aser iba atema Union Minister Sonowal-i Department ajanga proposal yanglur agütsütsü ashi, ta House nung metetdaksü.

## MULUNGNEN O



**Asür Er. T. CHUBAMANEN JAMIR**  
(13.03.1968 - 14.11.2021)

*"Takoksa ji kecha dena masadangtet,  
Sake ne temeim onok den doktsür aoba ji  
Iba takoksa den tuluba lir".*

Onoki teti meima aliba kinungbo, tsurabur aser adianu, Asür Er. T. Chubamanen Jamir shiranga aliba mapang nungi tasü nü tashi nenok temeimertem shirnokisa timtim aser asükhu mangyim jashi mapang nung nenok tamang sarasadem, nübu, rongsen aser shisatsü agi yaritepba ozü mulungjang nung teti asoshi zuluoka ayutsü. Nenok temeim aser aria bilemba mapatem asoshi kanga dang pelaba lemsateper.

Temoatsür Tsungremi nenok taküm maneni moajangma.

*~ Temeim kinungtsü, jala, Aser kinungertem*

## Tetsürtem anema inyaksangshi nokdangtsü sentong amenok



DGP Nagaland, T. John Longkumer, IPS-i 'car campaign' tenzüksüba noksa nung angur.

**Dimapur, Yimpoksüi/ November 25 (TYO):** November 25 nü old MLA Hostel Junction, Kohima nung "International day for the elimination of violence against Women" amungba mapang iba anogo nungtem nung "car campaign" ka tenzüksüba den "End Violence Against Women Now!" omen nung ajemdaker Gender-based violence anema anogo 16 sentong ya tenzüksü.

Sentong nung alakteta joker DGP Nagaland, T. John Longkumer, IPS-i, Nagaland nung aliba tetsürtem dang, iba inyakyim anema raratsü aser akoksar alirtem nem ochi obandang agütsütsü asoshi temzüng ozüng kübok lenmang balala aliba indang metetdaksü.

Paisa, Fundamental Rights aser Directive policies of state policies ajanga Indian Constitution-i, lokti nung tetsürtem meraket ajungkettsü aser parnok akhümtsüba beshitsü atema tebandang maliba lokti ka asoshi tamendakdak latetja lir, ta ashi. Indian Penal Code and CrPC (Amendment Act) 2013 nung legal provision tem ajanga tetsürtem temeden kümzüka ayutsü atema latetja lir. Item ozüngtem ya maneni Protection of Women from Domestic Violence Act 2005, (Prevention of Immoral Traffic in Women's and Girl Act, Sexual Harassment of Women at Work Place 2013, POCSO Act 2012, Prohibition of Child marriage Act, 2006, Indecent Representation of

Women (Prohibition) Act 1986 aser IT Act 2000 amala ozüngtem ajanga tali tashi taitba kümduksür, ta pai ashi. Longkumer-isa, tetsürtem anema inyaksangshiba ken o tem bentettsü atema Nagaland Police-i meranga inyakdar aser iba ajanga Nagaland kübok district ajak nung Women Police Stations aser Anti-Human Trafficking unit tem amenokogo, ta ashi. Iba den bendenloksema police station ajak nung Women Help Desks amenoka lir. Nagaland Police-i, 2018 küm nungi 2020 tashi nung tetsürtem anema inyaksangshiba ken o 249 benokogo aser iba dak sendakba nung nisung 19 puogo aser shibenertem ket nungi tetsür 26 aser pei teküp ayoker 18 kümzüksü, ta pai ashi. Paisa, iba sentong ya tangazükba balala agütsüba den tetsükdaktsütem bentettsü atema sensaksemtsü asoshi maongka agüja tetsürtem anema inyaksangshiba nokdangtsü aser agütsü nükjidong nung tenzüksü, ta ashiba den temzüng ozüng dak ajemdaker tebilemstü ajak tekaratiba nung bentettsütsü, ta tenangzüksü agütsü.

Sentong nungsa NSCW mendenbula Khrienuo Tachü-i, tetsürtem anema inyaksangshiba maparen ajak anendaktsütsü atema '16 Days of Activism' ya alima ajanga nung benoka inyaker ta ashi.

Sexual harassment, domestic violence aser tetsürtem

mezüngmeshia amshiba nokdangtsü atema lokti nem tangazükba agütsütsü nungdaker. Lokti ka ama asenoki Naga nung lokti nung tetsürtem anema inyaksangshiba maparentem jangja bentettsüji kanga tongtibang. Tetsürtemajak pei aliba tesem nung mashi mapang ka nung tetsübu kecha meleni tekümsüba kübok sadem sadema senzügenpongtettsüla, ta lai ashi.

Tachü-isa, tetsürtem anema inyaksangshiba maparentem ajak samatsütsü atema NSCW-i stakeholder balala den teka amteper inyakdar ta ashiba den, temelenshi ya tekükboka jenjang nungi tenzüksüla, ta ashi. Anungji NSCW-i temelenshi bener arutsü atema kin balala, kiyong aser Arogo lenirtem den teka amteper inyakdar, ta laisa shisem.

Kasa mapang nung Director, Social Welfare, Michael Zaren aser Member Secretary, Nagaland State Legal Services Authority, Victo Sema nungeria tetsürtem anema inyaksangshiba samatsütsü atema nüburtem nem tangazükba tali agütsütsü ayongzüka liasü.

Iba sentong ya Department of Social Welfare, NSCW, NSSWB, SRCW, Angawadi, Child Line aser Women Helpline, KCCL, AKMWP, NAC nung longjemer ayongzüka liasü. Iba campaign nung gari 50 shii shilem agi aser tetsürtem anema inyaksangshiba nokdangtsü atema parnok Kohima jila kübok tesem balala nung IEC materials, flyers, posters, banners amala lemja liasü.

Iba sentong ya Department of Social Welfare, NSCW, NSSWB, SRCW, Angawadi, Child Line aser Women Helpline, KCCL, AKMWP, NAC nung longjemer ayongzüka liasü. Iba campaign nung gari 50 shii shilem agi aser tetsürtem anema inyaksangshiba nokdangtsü atema parnok Kohima jila kübok tesem balala nung IEC materials, flyers, posters, banners amala lemja liasü.

## Heunambe nung temsüa alir ajak nem vaccine agütsüogo

**Dimapur, Yimpoksüi/ November 25 (TYO):** Peren block kübok Heunambe yimtsüng nung COVID-19 vaccine agütsü temsüa alirtem ajak nem vaccine mezüngbuba dose agütsüogo.

Yimdak GB tem aser lenirtemi yimtsüng nung vaccine agütsü temsüa alirtem ajak nem COVID-19 vaccine agüja yimdaklir noklang nung noklang nem vaccine agütsütsü temulungtetba nung tejakdangi aru aser yamaji Dr. Hedunkiebe, DVBO

(NVBDGP), Ihoilong, EAC aser Dr. Paokhotinlen Singson, MO I/c Poilwa PHC nung lenisüba nung iba yimtsüng nung vaccine agütsüba sentong ponguben tashi ayongzüka temsüa alirtem ajak nem vaccine agütsüogo.

Heunambe yimtsüng nung vaccine agütsü temsüa alir nisung 84 nem COVID-19 vaccine mezüngbuba dose agütsüogo, ta District Media Officer Shekho Sophie-i sangdong ka ajanga metetdaksü.

## ATMA ketdangsürtemi Khonoma aser Dzüleke semdang



Nov. 25, 2021 nü ATMA ketdangsürtem-i Khonoma aser Dzüleke nung Alder Based Farm School aser Organic Farm School semdangdang tangokba noksa nung angur.

**Dimapur, Yimpoksüi/ November 25 (TYO):** Joint Director ATMA-i anir Agriculture department Nagaland nungi ATMA ketdangsürtemi November 19 nü Khonoma aser Dzüleke nung Alder Based Farm School aser Organic Farm School semdanga liasü.

Tesem ana semdangba mapang ketdangsürtemi aluyimer tesayurtem aser iba tesem nung aliba tetsür aluyimer

anana den sensaksema, ATMA beneficiaries tem indang inyakyim aser terenlok indang jenjang asadanga liasü.

Joint Director ATMA, Dr. I. Amenla-i aluyimertem dang parnok luyim nung tali bendanga agütsüshir inyaktü aser külem aluyimertem asoshi tashitsüka asütsü atema takok otsü tajung yanglutsü ajungshi, kechiyong ATMA kübok Farm school amenokba nükjidongji ibaji lir, ta ashi.

## Noklak kübok kiyong ajak nung an lemtsü

**Dimapur, Yimpoksüi/ November 25 (TYO):** November 25 nü Noklak jila kübok kiyong balala chairmen ajanga kiyong ajak nung angati agi an 1200 den chiyongtsü lemtsüogo.

Noklak Town Sector Union tir, L. Imkhong aser Secretary Langoi nati, an chanu aser

chiyongtsü angati agütsüba aser Nokla jila nung alirtem rongsenketzüng jenjang ajungkettsütsü atema iba mapang tajung benokba atema Superintendent of Police Noklak, Dr. Pritpal Kaur, IPS aser Dr. Mahak, ICAR Dimapur dang kanga pelaba lemsatepa liasü.

## Nov 27 nü NPSA Hon Jubilee amungtsü

**Dimapur, Yimpoksüi/ November 25 (TYO):** Nagaland Police Service Association (NPSA) Hon Jubilee November 27, 2021 nü Nagaland Police Officer's Central Mess, Chumukedima nung amungtsü.

Iba sentong ya 11 ako nung tenzüksü aser DGP Nagaland, T. John Longkumer, IPS tetushi tejaoker asütsü aser alakteta jaoker ama Deputy Chief Minister, Y. Patton-i nungshilong sayatsütsü.

## Nagaland nung sorkar...

(TAPAK 1 NUNGI...)

Iba dak sendakba nung Minister in-charge of School Education, Tongpang Ozukum-i, sorkar balalai tesayurtem yokshitsü merangaka state ajunga nung tesayur agi anüngba ya department atema tebilemstü tulutiba lir, ta ashi. Pai, tesayurtem redeployment inyakyim ya benoka inyaktü ta ashi.

Paisa, jila balala nung tesayurtem talila lir saka parnok yimdak yimtsüngtem nung oa minyakner ta ashi.

Kasa mapang nung NPF Legislature Party Leader T R Zeliang-ia, wara pokteter aliba mapang school tem shibanga liasü saka tang school tem lapok

tenzüksü saka tesayurtem mapa nungi anenba aser küm ana tsüngda kar asüba ajanga tesayur agi anünger ta ashi.

Sorkar school tem tesayurtem melei inyaksangshiba mesütettsü ta shia House lenir dang tesayur shimtsü atema School Education Department-i mepeshiba agizütsü Zeliang-ia mepeshia liasü.

MLA Imkong L Imchen-ia, medical aser education department bo appointment atema tenokdangba agütsür aliba küboki maittsüla ta shia sorkar dang, ken o asadangshiba iba dept ana tenokdangba agütsür aliba küboki maitdaksütsü mepeshi.

## Nüburtem tenzüksü atema TMC nung aden: Mukul Sangma



Mukul Sangma

**Shillong, Yimpoksüi/November 25 (Agencies):** Taoba Meghalaya chief minister Mukul Sangma-i, pa aser MLA 11 TMC nung adentsü atema telemtetba agiba sangdongba mapang Congress party aija liasü.

"Onoki kanga junga asadanga sülen Trinamool Congress (TMC) nung adentsü telemtetba agiogo," ta Mukul Sangma-i Brehostibarnü Shillong nung osangbenertem den sensaksemba mapang ashi.

Mukul Sangma-i, Congress party koba pa aser MLA 11-i toktsür TMC nung aden, iba party yagi India nung opposition

party tongtiba ama maparen shidak benoka minyakteter, ta ashi.

"Onoki Trinamool Congress nung adentsü atema telemtetba agiogo," ta taoba Meghalaya CM Mukul Sangma-i Shillong nung ashi.

"Nüburtem tenzüksü atema bendanga agütsür aliba ajanga onoki iba telemtetba agütsüsa aküm. 2018 küm Assembly election nung srokar kümtettsü onok kanga temulung lema liasü saka tamakok angu. Election tembangba sülen onok züngsemtem anir aotsü atema inyakyim balala benoka inyakogo," ta Mukul Sangma-i ashi.

Paisa, "onok bendanga agütsür aliba longjemer sayuogo. State atema bendanga agütsür aliba ajanga ajak ajatetogo. Opposition ka ama onoki onok mapa shidak benoka minyakteter," ta shisem.

Mukul Sangma aser Charles Pyngrope nati ashiba agi, I-PAC tekolakba Prashant Kishor-i

parnok TMC nung adentsü atema ajungmesoa liasü.

Prashant Kishor ya TMC tekolakba aser West Bengal chief minister Mamata Banerjee den kanga junga sendaktepa lir.

"Congress nung adenba ajanga opposition ka ama onok dak tashi aliba ajak benoka inyaksangshi mesüteter," ta Mukul Sangma aser Charles Pyngrope nati ashi.

Kasa mapang nung Sangma-isa, state nung NPP-BJP sorkar aitsüogo.

"NPP ya BJP-i amenoktsüba lir. Party anapronglai khen khenbo kati ka aitsütepba ya tesümgangtsüka," ta pai ashi.

"Onoki nüburtem lemdangtsüba tashi anema nokdaksü. Opposition ka ama Congress-i pei mapa shidak benoka minyakteter. NPP ya BJP den sendaktepa lir. Anungji TMC-i dang iba telemdangtsüba tashi anema nokdaktettsü," ta taoba Meghalaya chief minister Mukul Sangma-i ashi.

## Manipur mokdanga ayuba ajanga inyaksangshi nung tetsükdaksü adok

**Imphal, Yimpoksüi/November 25 (Agencies):** World Meitei Council-i Manipur ajunga ghonda 72 mokdanga ayutsü atema ayongzüka sülen state kübok lendem nung aliba district tem nung nüburtem anogoshia inyakyim nung kongshiogo. BJP sorkari Meitei nungertem sentoker ta shia parnoki iba longkak aitba sentong ayongzüka.

Tesem kar nung tatlokba kar dak alia state ajunga mokdanga ayuba yimjung nung süitemogo.

Essential services dak sendakba nung senzusenpongba garitem dak alia tanga garitem senzusenpongtsü asoshi temelaba magütsü aser govt office, banks aser commercial establishment tem ajak shibanga liasü.

Kasa mapang nung All Tribal Students' Union Manipur-i aser tribal tem lokti tentet balalai mapang tatakzük ka makai rongsenketzüng nung tenokdanga agütsüba sülen tenem nung aliba district tem nung Hokolbarnü ayaterem nungi nüburtem inyaksangshi nung kongshir lir.

State sorkari Autonomous District Council Bill, 2021 benoktsü atema nongnanga atema parnoki longkak aitdar.

Manipur Chief Minister N. Biren-i ashiba agi, "iba ya mapang tatakzük ka makai rongsenketzüng nung tenokdanga agütsüba ka masü. Tenem lima nung tesem kar nung tenokdanga agütsür lir. Telok aikati iba longkak aiba sentong ya pumasemer aser ADC tem indang chairmen tem ajaki parnok iba longkak aiba sentong nung sendaka mali ta shiogo. Onoki sepaitem teyari nung garitem anir arudar."

Paisa, iba ken o ya state assembly-i masü saka Parliament-i achaayangtsü ta ashi.

Taoba Minister Okram Joy-i, iba bill pusemstsü atema Hill Areas Committee dak kecha tashi mali aser sorkar dangi iba ken o abentsü atema Assembly secretary daka kecha tashi mali, ta ashi.

World Meitei Council-i, scheduled tribe list nung Meitei nungertem bendenloktsü atema Centre dangi abentsü khanga arudar.

## Totzü atsütsü atema OIL aser KAAC na tenangzüktepba yanglu

**Guwahati, Yimpoksüi/November 25 (Agencies):** Dhansiri Reserve Forest nung totzü atsütsü atema Oil India Ltd (OIL) aser Karbi Anglong Autonomous Council (KAAC) na tezüluba nung tenangzüktepba ka yanglugogo.

Karbi Anglong district headquarters Diphu nung KAAC conference hall nung KAAC principal secretary Mukul Kumar Saikia-i aser director (basin manager-shelf) Dr Manas Kumar Sharma nati OIL den tenangzüktepba yangluba nung sign asü.

Tenangzüktepba ya küm ana atema yangluogo aser telok ana tangatettep dak ajemdaker atsülangshitsü akok. Iba inyakyim ya ali square km 396 nung benoka inyaksangshitsü.

Temetettsükaji KAAC tenung nungi chief executive member (CEM) Tuliram Ronghang, MP Horensing Bey, MLA Bidyasing Englung, Dorsing Ronghang, Rupsing Teron, aser (executive members) EM tem aser autonomous council züngemtemi shilem agia liasü.

CEM Ronghang-i osangbenertem dang ashiba agi, "onoki OIL den Dhansiri temeket nung hydrocarbons bushitsü atema tenangzüktepba ka yangluogo. Totzü

aliba tesemtem nung company-i anogo ana asem ka tsüngda totzü atsü tenzüksü. Totzü bushiba mapang tenzüka mapang KAAC-i mapa inyaker kwi nungdaksü aser mapa kwi adoktsü iba indang metetdaksü."

Ronghang-isa, "jurila ali kiburtem nem taa parnok ali melena temenok agütsütsü. OIL-i senotsü ya KAAC account nung inoktsütsü aser KAAC-i ali kiburtem nem lemtsütsü," ta ashi.

"Oil company yagi KAAC nem totzü atsütsü atema amshiba arem li atema taa agütsütsü. Tanga sarutem ajak KAAC nem agütsütsü. OIL-i ita shia KACC nem revenue sen crore 5 agütsütsü ta shiogo," ta pai ashi.

Kasa mapang nung Dr Sharma-i, "mezüngbuba tesem nungbo inyaksangshi tenzükgogo aser ni CEM dang inyakyim tem benoka inyaksangshi tenzüksü mepeshir, ajita asünung dang onok maparen tenzüktettsü. Arem li dak sendakba nung inyakyim talangka lir. Iba inyakyim ya forest department-i anepalur alitsü ta amanger. Ni KAAC züngsemtem dang onok nem teyari agütsütsü mepeshir, ajita asünung dang inyakyim tem takaratiba nung benoka inyaktettsü," ta ashi.

## Tripura election nung BJP züngsemtemi timtem agütsü

**Agartala, Yimpoksüi/November 25 (Agencies):** Trinamool Congress (TMC), BJP MLA Sudip Roy Barman aser TIPRA mendenbuba Pradyot Debarman nungeri, state nung civic bodies election agiba mapang tesem balala nung timtem adokba metetdaksüogo.

Tripura Trinamool Congress (TMC)-i ashiba agi, BJP züngsemtemi election agiba mapang tanga party nem vote agütsürtem aser candidate tem züka merenshir.

"Vote agütsürtem dak parnoki azüker. Tripura BJP-i vote agütsürtem dak azük tenzükgogo. Iba dang ya democracy ta asenok shitettsü asü? asenoki iba dang ya free & fair elections ta jatettsü asü?" ta TMC-i asüngdang.

TMC-isa, "Tripura BJP indang Presiding officer aser booth agent temi onok agent tem polling station telungi maitdaksür. Returning officer nem iba osang agüjaka tang

tashi kecha jenjang agia mali," ta ashi.

"BJP züngsemtemi tintet rogotem parnok indang temeden amshiba atema nongshia merenshir," ta TMC-isa ashi.

Kasa mapang nung BJP lenir aser taoba Tripura health minister Sudip Roy Barman-ia, civic bodies atema polling mapang tesem balala nung lendong atalokba jangjatsüogo.

"Tesem balala nung lendong atalokba ni angazükogo. Iba ya democracy atema majung," ta BJP MLA Sudip Roy Barman-i Agartala nung osangbenertem den sensaksemba mapang ashi.

Kasa mapang nung TIPRA mendenbuba Pradyot Debarman-i, par party worker tem BJP worker temi amaker ta shiogo.

"Vijay Kumar choumohqni nung lendong atalokdar, kong Tipra Motha worker tem BJP worker temi amaker," ta Pradyot Debarman-i tweet asü.

### GOVERNMENT OF NAGALAND

HOME DEPARTMENT: : POLICE 'B' BRANCH

NO.POL-B/SWR/ESTT-1/2/20

Dated Kohima, the 25th Nov', 2021

### NOTICE FOR INTERVIEW

It is hereby informed that the interviews of the candidates who have applied in response to the Advertisement NO.POL-B/SWR/ESTT/1/1/2018 dated 12th Feb 2020 by the Home Department, Government of Nagaland for re-employment of eligible Ex-Servicemen against certain posts in the Directorate of Sainik Welfare & Re-Settlement, Nagaland, and in the Zila Sainik Welfare Offices, Nagaland, will be conducted by the Selection Board, constituted by the Home Department, as per the following schedule:

Date	Posts	Venue	Time
13.12.21	<u>Class I Gazetted</u> 1) Director 2) Dy Director 3) Office Supdt.	Chief Secretary's Conference Hall,  Nagaland Civil Sectt. Kohima	11:00 AM
14.12.21	<u>Non Gazetted</u> 1) Steno Grade II 2) HA(Distt) 3) UDA(Dte/Distt) 4) Welfare Organizer(Distt)	Chief Secretary's Conference Hall  Nagaland Civil Sectt. Kohima	11:00 AM
15.12.21	<u>Non Gazetted</u> 1) Accountant 2) LDA Cum Typist (Dist) 3) Office Peon(Dte/Dist) 4) Sweeper Cum Chowkidar(Distt)	Chief Secretary's Conference Hall  Nagaland Civil Sectt. Kohima	11:00 AM

#### Note:

- Only those candidates who have been found to be eligible by the Home Department after examination of the documents submitted, and other details provided by the applicant, may appear for the interviews for the post(s) applied by them.
- The candidate may visit the site [www.nagaland.gov.in](http://www.nagaland.gov.in) and see the uploaded lists, or visit the Office of the Director of Sainik Welfare & Resettlement, Nagaland and Zila Sainik Welfare, Nagaland where the lists will be put upon the Notice Board or contact Police 'B' Branch Home Department during office hours, to find out if he/she is eligible for appearing for interview(s) for the post(s) applied by him.
- In case a candidate is shown as being ineligible, and he is not satisfied with the reasons given for being considered ineligible, he may submit a representation giving the grounds on which he should be considered eligible; to the Under Secretary, Police B Branch, Home Department (phone number 9436077127) either in person, or through email [tosshnagaland@gmail.com](mailto:tosshnagaland@gmail.com) / [temsumozur@gmail.com](mailto:temsumozur@gmail.com) not later than 7th of December 2021. The Home Department will examine the representation, and taking into account the facts presented and other relevant aspects, take a decision regarding the eligibility, and convey to the candidate, which shall be final.
- All the candidates must furnish their original personnel/service documents before the Selection Board at the time of interview.
- It may be noted that attendance in the interview doesn't mean automatic selection. The final selection and appointment subsequently of any eligible candidates a post will depend on the overall qualification of the candidate, his/hersuitability, performance during interview; and other relevant factors as decided by the Selection Board, vis-à-vis other candidates, and as per the requirements of the Raja Sainik Board/Directorate of SW&R, Nagaland.

Sd/-

S. R. SARAVANAN, IPS

Special Secretary to the Govt. of Nagaland.



## TIR YIMYIM YIMOBILEM (EDITORIAL)

DIMAPUR ROGONÜ, YIMPOKSÜ (NOVEMBER) 26, 2021

### Asenoki kechi inyaknür jangjatsüla

**G**overnment ket nung sen lir aser sen jagi lanurtemi pei jangraba mapa tenzüka inyaka takar akümtsüsa sentong tapu aika lir. Item sentongtemji center government kübok ministry tapu balala ajanga lanurtem yaritsü asoshi yoker. Item sentongtem rongnung MSME (Micro, Small, & Medium Enterprises), Tribal Affairs, Industries aser Agriculture & Cooperative Ministry amala nungi bank ajanga sendem tejemba nung sen aputsür aser ano sen apuba nung jagi shilem kabo angati agütsüba teyari akümer. Ano MSME ajanga anguba teyaritemjibo state government majangi inyaker, anungji nisung aika dang mapa bolua teyari asüngdanga jajatsü nungdak madoker. Ano, tajung kaji tanü putu yabo digital aser online putu lir, anungji government nungi kechi ministry aser kechi department ajanga lanurtem yaritsü asoshi sentongtemsa renema lir, itemji akhidang amato nübotsüka aser rongsen endoka jajatsü menügdaker saka ministry aser department shia pei website lir, anungji item website nung jagi asenoki metetnüba ajak lapoka repringtettsü aser tsüngdong maoyonga asen kidang nungi item ajakji agizüka inyaktettsü. Atangji, MSME ama nungi sen aputsü atema senmelen (mortgage) ali agüja atatsü nungdaker, anungji ali makartembo sen apunüyonga timtem ajurur aser ali akayonga ali atemaji government-i kuli kakat agütsütettsüsa Cadastral area kübok mesüra bank-i magizüker, ibayongji Nagaland nung SARFAESI ozüng nungdakba indang jembir, kechiyong iba ozüng yagibo sen aputsütsü atema senmelen ali tapu ajak agizüker. Anungji, kodang Nagaland nunga iba ozüng ya latetdir, asen akaba liji Cadastral li masüyonga tagidak akaba mapa nung amshitettsüba li süra, iba li tenüng nung asenoki MSME nungi bank ajanga sen aputettsü. Ajisüaka, tanga ministry-tem Agri & Cooperation, Industry aser Tribal Affairs ama nungibo senmelen ali meyutsüyonga aseni inyaksüba mapa nungji tajangzük lia sayutetra, asenok mapa tenzüksü asoshi nungdakba senji bank nungi agütsütsü. Aji oda, government nungi bank ajanga sen aputsüba, tamasa bank-i asen dak temulung lemtettsüsa asenok alitsüla aser tanabuba nung, kanga tongtibang kaji, asenoki kechi inyaknür iba mapa indangji asenoki kanga junga meteta alitsüla aser mapa tenzüker küm kwi tashi nungbo sentsü ajak aomar peisasa nokdakteta tajangzük lia inyaka aotsü, aji jangjatsüla. Tatishitsü agi, asenok lanurtem aikati government nungi bank ajanga sen aputsü lenmang angubaji angati sen amai bilemer, anungji shitakba mapa inyaka takar akümtsüba nükla nung masü saka senji apua tajangzük magütsüba mapa kar nung amshitsü bilema apur. Ibayongji, tenüng agi asenoki sen apua inyaksüba mapa indangji tangari agüja aliba "project report" mashi ka yanglur agütsür. Aseni inyaksüba mapa ser nung asenibo kechiar memetet ser sen aputsü asoshi dang bilema tangar nem renemdaktsür agütsüba "Proeject report" agütsüba, asenoki memetet dang ashi, aji asensasa asen ashioksüba mapa ka lir. Asenoki küm aika yamaji bank nungi apuba senji angati sen angu amato bilema, sen agizüka agir sentsü mao toktsüba ajanga, tangbo bank-ia asenok dak tamang maka kümogo. Ibaji shia arudakja bank-i dang masü alimai Naga nung lanur, ano talisa Aor lanurtem dak temulung lemtettsüsa tanü lanurtemi pei mapa nung kanga nendaka aser ochishia inyaksüba kanga tongtibang kümogo. Shitakba nungbo asenok ket nung ajak kaer, saka asenoki asenoksasa takar mekümtetbaji, asenoki kechi inyaksüar memetet aser mejangja ser apusoba ajanga timtem ajurur aser tanabuba nung, tangari asenok dak temulung lemtettsüsa asenok maliba agi tangar nungi asenok ajungkettsüsa teyari mangur. Ashi, asenoki asen mapa ajanga asenok dak bank-i temulung lemtettsüsa alinungbo asen kidang makayonga bank nung akaba senji asen meyong sen süla. Takar akümtsüba ya meranga inyakba kija agi masü, saka asenoki kechi inyaksü bilemer, iba indangji asenoki tarutsü indang dena jangjajanga metetba aser asenok dak asen mapa agi tangari asen dak temulung lemtettsüsa aliba ajanga takar kuma pei jangraba aser nübortem nungdakba mapa inyaktetter. Iba tangatetba nung asenokbo asenoki kechi inyaker, aji jangjamadi aser tangari asen dak temulung lemtettsüsa ochi ashiba nung dang masü saka inyaker ashiba nung aser wainshin metetba nung yakyaka lidi.

## OLEMSABANG

### TEINTET ROGO ASER AZÜNGMEYAK. (Ageing and Loneliness)

~ Mr. LONGPOZENBA

(Yashi adok nungi...)

Temeimtsü teintet rogo tsürapurtemi item tiatem ya ajurudang, chirnuri, arogoi, loktiliba balalai teinyaktsü kar külemi shisadangi.

Item tsürapurtemi parnok sasa inyaktettsüako, litettsüako, ano nai jempitettsüa ta shia, nü dak aliba shisatsüji alimai ano nungdakerako ta shia ajungshitsüba, parnok sasa parnok dak temulung lemdaktsütsüba kanga tongtipang teinyaktsü ka lir. Chirnurtemi tsürapurtem azüngmeyaka alibaji yakta repringteta parnok den mapang entoktsü mapang kar atakteta ayutsüji koda tongtipang. Parnoki jangraba kar inyaktettsü, tesem balalai anir aotsü, parnok züngapurtemden ajurutepdaktsütsü inyaktettsü. Kibong nung nungdak tebilemstütem jembidang shilem agidaktsütsü nungdaka lir, parnok dena inyaktettsü, jembitsü maparen tasa yanglutsüla. Parnok mapang intoktsü maparen yanglutsüla, pelaa toktsütsüba koda tongtipang. Mapang mapang nung kibong nungi perokshiba chirnur, semchirsemnur, anükapangtem den telongjem mapang kadaktsütsüba parnok asoshi mapang tajung asütsü südi. Koba tesendaktep ajanga parnok taküm nung tebilemstütem, azüngmeyakbatem ajema kümdaktsütettsü. (semchirsemnurtem dang tettsütebou tem den mapang endoktsü junga sayutsüla). Pei tsürapur azüngmeyaka metoktsütsüba temeim nungi adoker. Nü takümüji kanga mazüngi aliba taküm ka asütsü akok saka tsürapurtem nem mapang agütsütettsüba koda tongtipang teinyaktsü. Ajak nung masütsü akok saka teintet asen tsürapurtem parnok nungdak peridaktsüba jagi parnok azüngmeyak tia nungi piladaktsütsü tashi lir. Ozür tsürapurtem ya onok den alima nung joko mapang talangka malitsü ta temulung nung aria bilema, menungraba agi parnok tajungtiba nung anepalua yaridang memeteti parnok azüngmeyak tia nungi aniteter alir.

Loktiliba balala ajanga teintet tsürapurtemji azüngmeyaka metoktsütsü asoshi, mapang mapang shia parnoki shilem agitettsüsa sentongtem yanglutsü nungdaka ta metettsüla. Tanü lanu putui parnok tsürapurtem timtem aser taginüba angatettsü nungdaker. Item teintet rogotemji akümtsüba, shilem agidaktsüba jagi azüngmeyaka bilemba shisatsü nungi jenbudaktsür. Government aser NGO's-i inyakba sentongtem dak alaka külem alir nüpurtemi item teintet rogo nungdak peridaktsütsü asoshi asameyang balala ajanga anepalutsüji kanga nungdaka lir. Lokti ka nung lokti tapu aika lir, aser item rongnung iba lokti ya tongtipang ka lir ta angateter. Teinyaktsü sentongtem aika rongnung item tsürapurtem anepalutsü sentong yaa tongtipang ka asütsüla. Item teintet rogotem dang parnok nungdak aser taginübatem asoshi temeim agia anepaluba ajanga parnok taküm nung azüngmeyaka bilema, aliba tiatem nungi jenbudaktsür.

Arogoi küm shilem nung la teinyaktsüren nung teintet rogo (senior citizen) asoshi Sunday ka mongtsüba jagi teperi masü amai bilemer. Iba dak alaka ano tenzükertem, arogopurtemi takoktsü lemanng ajak nung shilem tajungtiba agia alitsü südi ta amanger. Takoktsü maparen dang süra arogoi ano küm shilem nung parnok asoshi taküm renemshiba sentong, seminar balala, teintet rogotem lokti nung, kibong nung, arogo nung, koda lipaliritsu, item indang tesayubatem agüjaa anepalutsüji kanga nungdaka lir. Sarasadem aser teyaritep nung arogo nem Tsüngremi moatsüba temoatsütem nungi parnok den tera agi lemsatempa nung parnoki kanga pelar. Parnoki ajanga aruba tamang jenjangtem (degree of belief), asüngteta lipaliruba, meranga inyakbatem, ano aika, item nungi ajemdaker, tongtipangsa lanu putu nem tajungshiba agütsüdaktsütsü parnok asoshi shilem tajung asütsü südi. Kodak lima tongdaktsütsü asoshi arogoi shilem tajung agia, khuret akatsüji tongtipang teinyaktsü lir. O agipo kija aser lokti ajaki akümtsüba jembir saka kodang maparen nung repringdangtir lemanng aisü nung tamakoker süa aliba angur. Lemang balala ajanga azüngmeyaka aliba, toktsüba temeimtsü teintet rogotem aika dang lir, inyaka aruba ama ano akoktsüba lemanngtem nung parnok anepalutsüji koda tajung asütsü.

Alishi nung kodang nisung ka tain kümtir ajak dangbo meshitetba touashiba aika ajurur. Kibong nung, lokti nung, temulung yirur aliba teintet rogotemji, arogoi akokba lemanngtem nung angateta anepalutsüba koda arogo ka tongtipang teinyaktsü lir. Item takütem yagi arogodakji rangshia repringa lemanng kar nungibo parnokji anepalutsü yimlaa atar. Arogo kaji taneptsür aser anepaluba lokti ka asünung santem ajak asoshi meranga inyakbaji santemi kanga aginür. Shinga meshimtok ama, arogo kanga mazüngi dang liaka, item nüburtemji anepalutsü kanga nungdaker.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

# Chhattisgarh nung Khristan ka tasü mang rema aliba tutetdaksü



Telung noksa nung Khristan, Laxman Markam tasü mang ali nungi tuteter yua aliba noksa nung angur. Chhattisgarh nung tribal yimtsüngem nung Khristantem amakba bushisüngdangtsü atema social activist Medha, Patkar leniba nung team kati Bastar district kübok yimtsüng balala semdanga Khristantem ajurudang tangokba noksa nung angur.

**New Delhi, November 25 (Agencies):** India kübok Chhattisgarh state nung Hindu yimsü alia amangertemi ajungshia tribal yimsü amangertemi Khristan ka tasü mang ali nung remer liasü, ta osang ka ajanga metetdaksü.

Bastar district kübok Gumadpal yim dak arrshi küm 25 Khristan, Laxman Markam asüba sülen pa tasü mang ali nung remer liasü, ajisüaka anogo ana dang lirbo October 29 nü yimtsüng balala nungi nisung 50 shi adenshir asür kinüngtsü aser adianutem nem kangshia tasü mangji ali nungi tanaben tutetdaksü, ta Methodist Arogo ka nung pastor, Samson Baghel-i metetdaksü.

Osangbener den jembidang pastor Bhagel-i, "Parnoki Laxman tasü mang ali nungi tutetdang ta tuyua liasü. Kinüngertemi lokti dangji, süra tasü mangji kong aremstü, ta asüngdang saka parnoki yim dak Khristantem tasü mang meremdaksütsü ta shia tasü mangji ali nungi tutetdang ta akhang," ta metetdaksü.

Asür adianu, Sitaram Markam-i ashiba agi, yim dak lirtemi par adianu mang aremba liji mangatetep li, ta metetdakja liasü.

Mapang talangka jembiba sülen Khristantem kanga amokmerenba agi tasü mangji tutettsüsa aküm aser yim dak nungi mile 15 shi pilar aliba Pastor Baghel'er yim dak remang ta ashi.

Iba sülen Pastor Baghel-i police aja. Tasü mang tutetba sülen tasü mangji nija li ka nung ghonda aika ayu, iba sülen ang police arua atong. Police tetuyuba nung tasü mangji mezü ng rema alidaksü tanaben remdaksü.

October 27 nü Laxman malaria tashidak agi asüba sülen yim dak lirtemi par kibong dang asüpila sentong agitsü lezmükja aliba tesemji Hindu nung aser

tribal yimsü amangertem atema dang lir, ta ashi. Parnok tsü ngda mangatetep adoka mapang talangka jembiba aser iba anogo nungji telemtetba kecha magiteti liasü.

Sitaram Markam-i, "Tasü ngnep [October 28] yim dak yimsüsürtem tanaben adenshi aser iba tasem nungji Laxman tasü mang meremdaksütsü lemteta liasü. Parnoki onok dang nenok meyong nija li nung tasü mangji remang ta ashi, anungji onoki ashiba amaji inyak," ta metetdaksü.

Yim dak Khristantemi Markam'er kinünger ka nija li nung mang aremstü lemteta idakji tasü mangji arem, saka October 29 nü parnoki kangshia tasü mangji tutetdaksü.

Tasü mangji tanaben kasa tesem nungsa aremba sülen executive magistrate aser police-i yim dak lirtemi ajak ayongdena senden amen. Ketdangsertemi junga asadanga sülen Hindu nung aser tasü mang rongdokba tesem anasa Khristantem tasü mang aremstü temelaba agütsü.

Ajisüaka police aoba sülenbo Hindu nungertemi Pastor Baghel dang joko na yim daki marudaksütsü ta metetdaksüba den Khristantem amokmeren.

Pastor-i, "Yim dak lirtemi Khristantem dang nenoki Khristan yimsü medoktsüra timtem ajurutsü, ta amokmerenba ajanga Khristantem yim dak nungi jena aotsüsa akum," ta ashi.

Iba tatalokba sülen pastor-i iba yimji anabenbo semdangogo saka pai Amongnü tekülem sentong ka danga ayonga magi.

"November 6 nü ni iba yim semdang saka Khristantem amokmerenba den kü taküm lendong nung lir ta ashi, anungji iba anogo nungjagi tenzuka ni Amongnü tekülem sentong ka danga ayongzuka magir," ta pastor-i metetdaksü.

Gumadpal yim dak Khristan 9 lir aser tongti Arogoji mile 15 shi pilar Mandwa nung lir. Küm 15 tejaklen Pastor Baghel-i Gumadpal yim dak sayutsü ngi tenzuka liasü aser tang tashi nung iba yim dak nisung 9-i Khristan yimsü agizükogo.

Küm asem tejaklen Laxman Markam tashidak anepa sülen pa den par adianutem aser kibongtemi Khristan yimsü agizüka liasü.

Sitaram-i, "Onoki süngyanguitem külemia liasü. Kenü Laxman-i Arogo ka aliba indang onok den lemsatapa liasü, anungji onoki iba Arogo dangi ao aser pa tashidak junga anep. Iba mapang nungjagi onok melung meyipa liasü, " ta metetdaksü.

Pastor Baghel-i yim 15 nung Khrista osangtajung proker, aser pai ashiba agi, Hindu yimsü alia amanger telok tila kati yimtsüng balala sema senzür aser Khristantem anema inyaktsü atema tribal yimsü amangertem ajungmesor.

"Hindu yimsü alia amanger nisung 20-30 shii yimtsüngtem semdang aser lenirtem aser yimsüsürtem ayongzuka senden amener. Item ama senden nung adentsü atema yim kar jaoker aser Khristantem anema inyaktsü ajungshir," ta pai metetdaksü.

"Iba sülen parnoki Khristan kibong kaka jaoker aser Khristan yimsü tokjang mesüra nenoki timtem ajurutsü ta amokmerener. Khristan kibong aika yimtsüngtem nungi mindokogo aser yim dak nungi maridokyonga loktiliba nung sendoker," ta paisa metetdaksü.

RSS-i pusema Vanvasi Kalyan Ashram ama Hindu nationalist telok balalai India kübok tribal tesemtem nung akhi tribal yimsü amangertem mesüzuka Khristantem anema inyaker, aser ibaji ajanga tribal areas nung mapang shia timtem ajurur.

## ANO GO ABEN TSÜNGREM DEN

### Meshiang aser nai angutsü

*Nenoki meshir, saka mangur, kechiaser nenok pei azüabung nung endoktsü asoshi nenoki aibelena meshir. Yakob 4:3*

Yakobi iba shidi tamangertem dangi zülu - kin ter ana prokshia alir dangi zülu (1:1). Apijemtsü Shin kaket nung ama pai shisa kaa alitsü indang zülu, aser pai temeshi liba-liro aser Tsü ngrem O nung tashi angaba dak ranglok. Angashitsü karaang, jembitsü meilungi süang, ain adoktsü milungi süang, tsürabur malir aser amitsür semdangang, temeli azüokang; aser ne tamang akangakanga liang.

Idangji pai kechiba parnok nungdak asü ngdangtsüla aser koda asü ngdangtsü iba indang jembiba. Nübur rongnung Tsü ngrem nungi item kuli asem rong nung ka mesüra kati anünga lir: 1) Parnok makar kechiaser parnoki masü ngdang, 2) Parnoki tai meshir, aser 3) Parnoki Tsü ngremi mulungba ama masü ngdang.

Laishiba ajunga nung asenoki Tsü ngrem dang koda meshitsü aji shia lir. Aiben Yisui meshiang aser nenoki angutsü ta ashi (Mathi 7:7; Luke 11:9). Asenoki kechisa meshir aji asenok nem agütsütsü ta Yisui ashi (Yohan 15:7). Yohani ashi, asenoki kechisa meshidir Pai agütsütsü ta asenoki amangtsüla (1 Yohan 5:15). Tejen Lai nung Dawid ashi, Tsü ngremi asen mulungjagi jangraba ajak agütsütsü (T.Ken 37:4). Süra kechiba asenoki asü ngdangba asenoki mangur? Idakji tama metettsüba ka lir. Asenoki tebilemba shitak agi meshitsüla; asenok Pa dak alitsüla; asenoki Pai mulungba asü ngdangtsüla aser Pa O azü ngba aser sarasademba ajanga asenok Pa dak pelaa alitsüla. Sempet tajung ajak Tsü ngrem nungi lir, asenoki koda Pa dang asü ngdangtsüla aji dang asenoki metettsüla.

Tsü ngrem, Nai mulungba ama onoki asü ngdangra tasü ngdangba ajak agütsütsü nangzük nung Ne tenü ng asanger. Amen.

## America nung shilem 58-i Laishiba nung shia aliba Tsü ngrem dak amanger

**November 25, 2021:** langzü; 2020 shilem 11 aser America nung timbakati 2017 küm shilem 10 liasü, 'Laishiba nung rasa-a shia aliba anungji Tsü ngrem mesüra Tsü ngrem' dak amanger, ta temaba tashi ka lir ta Pew Research Center-i agiba mamanger shilem tajemba survey ka ajanga bushitet. kümogo.

America nung tain 10 shia nungi kati dang Tsü ngrem 73-i kodak lir ta amanger aser mali mesüra temaba tashi ka shilem 62-i molumi lir ta amanger. Kodak lir ta amanger ajangasa bushitet. timbaka evangelicals (shilem 96) lir, tanak nisungtem Arogotem nungi zü ngsemtem

Iba survey ya Mongolbarnü shilem 93 aser Catholic (November 23) saya. Khristan shilem 90 ) lir.

"America nung tain shilem 58-i Laishiba nung shia aliba Khristan shilem 90 ) lir. Tsü ngrem dak amanger, ta Kodak aser molumi lir ta langzü; shilem 32-i parnoki amangertem rongnung Laishiba nung shia aliba teburtem dang nungi tetsürtem Tsü ngrem dak mamanger saka timba; tetsür shilem 78-i kodak anü ng-ali nung kanga temaba lir ta amanger aser teburtembo tashi ka lir ta amanger, ta ashi," shilem 68-i dang kodak lir ta ta survey ajanga metetdaksü. amanger. Tetsür shilem 65-i

America nung ajak senteper shilem 91-i Tsü ngrem mesüra temaba tashi ka lir ta amanger. 2020 küm Pew

Research Centre-i kasa tasü ngdangbatem asü ngdanga survey agiba mapang nungbo America nung shilem 89-i dang Tsü ngrem mesüra temaba tashi ka lir ta amanga liasü aser 2017 survey nung shilem 90-i kasa telangzüba agü ja liasü.

America nung shilem 9-ibo Tsü ngrem mesüra temaba tashi ka lir ta mamanger, ta tain 6,485-i shilem agi.

**OLONG PAITEP # 6008**

	1				2	3				
4			5							6
						7				
	8									
	9			10			11			
						12			13	
14										
						15				
		16								

<b>TIPILEN</b>		<b>LANGTSÜNGLEN</b>	
2. Sü jeplok	- (4)	1. _ _ _ _ i	- (4)
4. O agi merenshi	- (5)	3. Kasa masü	- (6)
7. Ayongküm li	- (5)	5. Nüchi masü	- (5)
8. Chiyungtsü mapang süiadok	- (4)	6. Tashi endok	- (5)
9. Tsüngrem den jembiba	- (9)	9. Langtem	- (5)
12. Saklok	- (4)	10. Anü malidang	- (6)
14. Samaba mebushitet	- (5)	11. _ _ _ _ kibur	- (5)
15. Mejanga onü	- (5)	13. Tebur tembar tsüngda	
16. Tzü shiruru ka	- (4)	jatepba	- (4)

**OLONG PAITEP # 6007 TELANGZÜBA**

<b>TIPILEN :</b>	<b>LANGTSÜNGLEN :</b>
1. Lemsä, 3. Osang, 5. Mezüng,	1. Lamén, 2. Sangken, 3. Omen,
6. Agi, 7. Süra, 8. Tebutem,	4. Asüküm, 7. Sendong, 8. Tejang,
9. Amen, 12. Odi, 13. Asayar,	10. Tanga, 11. Tazü.
14. Angsü, 15. Agima.	



Alokba mapang ka nungsa tetsür tobour tajung asem den kazür, koba anga meshim nung tendangtsü atema tetsür shia nem Rs.50,000/- agütsür, pei pei kolok yari amshiang ta shir yok :

**Mapang tatsüka süir külen.**

- Mezüng aiür** : Nai agütsüba sen toagi ni süoshi set pungu, watch ana, make-up kar ta aliogo, kechiyong ni na kanga meimerjito nai niji junga ajitsüla angto!
- Tanabuba aiür** : Nai agütsüba sen toagi na atema suit ana, watch ka, after shave ishika ta aliogo, kechiba süra ni na onsara meimerjito.
- Tasembuba aiür** : Nibo sen ajakto stock market nung inoker joko tajangzüka arua re-invest süogono, ana kibong atema pilemtsüla to na?  
Alokba to kangasa pilemdanga study süa kazür kechianga mesayang, par asem rongnung tejimi tuluba ka den kibong aküm!

Lilir : WhatsApp

**TANÜBO NAI LANGZÜANG**

Q. Koba indang 'DEAFinitely Leading the Way' ajanga ABU - UNESCO Peace Media Awards 2021 takok angu.

- [A] Doordarshan [B] NDTV [C] Times Now [D] Zee TV

===== (Taruba adok nung onoki langzüsü)

YASHI ADOK TELANGZÜBA : November 21

**AO OSHI ANGAZÜKDAK:**

TANÜ ANGAZÜKTSÜBA OJANG



**Leptsü**

(n) kioktsü yanglua amshiba dong ( broom plant)

\* Tanü asüngbo **leptsü** kioktsü sen tasak kümogo.

**Leptsü**

(v) o meyipa agütsü (retort)

\* Leniri nangzüker meinyakba agi nübortemi pa o **leptsü**.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**NAI-A YA METETTER MA**

Philippines tsür Francisca Susano, shiba alima nung tantsütüla aser 19th century nung asor taküm alir rongnung la asütsü ta bilemer, Hombar aonung 6:45 ako meta Kabankalan, Negros Occidental nung la iba akümlü nungi pilaogo. Osang ajanga angazükba agi, Susano arishi küm 124 liasü. Philippines linük Spain yimsüsüba kübok aliba mapang, 1897 küm September 11 nü Susano soa liasü. Guinness World Records-i Susano ya alima nung tantsütüla (oldest person) ta sangdongtsü atema maneni kuli tejangja bushidar.



**SUDOKU # 6049**

**TELANGZUBA # 6048**

9			2		8	6	4			5	3	6	8	1	2	7	4	9
	8	3	5					2		9	8	7	3	5	4	2	1	6
4			7	3		1	8	5		2	4	1	9	6	7	3	5	8
	1	5		7	6		9			7	9	4	2	8	5	1	6	3
	6	9	4		3			8		3	2	5	6	9	1	8	7	4
8			9		1					1	6	8	4	7	3	9	2	5
			6	9	7		2	1		8	5	2	1	4	9	6	3	7
7			3			5		9		6	7	3	5	2	8	4	9	1
6				4			3			4	1	9	7	3	6	5	8	2

**OJANG LUTEP # 5605**

- EMZARÜKA :
- AKINY :
- NGNU :
- AJTSÜUNGBA :
- NGSERNU :
- ENKH :
- MEEMDBILANGI :
- KEINYAR :
- ÜDAASNG :
- KSAAKOR :

**OJANG LUTEP TELANGZÜBA # 5594**

JOKO AUDIT MAPANG ATONGERJI NISUNG AIKA SHISABULU KHURET JENTI ALITSÜ

**TAN HOPTA ATEMA - KOMA SÜLA ?**

Q. Asen lima nung 'Clean Election' indang ya kenyongi mejembi aser meinyak nunga koma süla ?

# PM-i Jewar International Airport atema lung azüngtsüogo



Novmber 25, 2021 nü Uttar Pradesh nung Gautam Buddha Nagar district kübok Jewar nung Ato kilonser, Narendra Modi-i Noida International Airport yanglutsü atema lung azüngtsüba sentong nung Uttar Pradesh Chief Minister Yogi Adityanath, Deputy Chief Minister, Keshav Prasad Maurya aser BJP MP, Jyotiraditya Scindia nung adenba noksa nung angur.

**Lucknow/New Delhi, November 25 (Agencies):** Noida International Airport yanglutsü atema lung Maurya aser BJP MP, Brihostibarnü Uttar Pradesh azüngtsüogo. Jyotiraditya Scindia nung Gautam Buddha Nagar Iba sentong nung Uttar Pradesh Chief Minister Yogi Adityanath, Deputy Chief Minister Narendra Modi-i Adityanath, Deputy Chief Minister Keshav Prasad Maurya aser BJP MP, Jyotiraditya Scindia nung adenba noksa nung angur.

Noida International Airport atema kikümbang ka akümtsü, Greenfield Airport dang Jewar airport taka ajar. Iba airport ya Noida nungi kilometer 50 shi pular yanglutsü aser Yamuna Expressway ajanga otettsü.

Noida International Airport yanglutsü atema lung azüngtsüba sülen Modi-i Uttar Pradesh nung BJP sorkari terenlok mapa balala inyakba metetdakja liasü.

Kobi melii Uttar Pradesh nung assembly election agitsü lia Modi-i, airport tasenba ajanga Uttar Pradesh ya export-centre ka akümtsü, ta metetdaksü.

Paisa Noida International Airport ya 2024 küm renemtsü aser iba airport ya North India

atema kikümbang ka akümtsü, ta ashi.

Jewar nung ali hectare 1,300 nung international airport ya yanglutsü aser küm shia iba airport nungi passenger crore 1.2 dak tema senzütsü.

International airport tasen yangluba ajanga Delhi, Noida, Ghaziabad, Aligarh, Agra aser Faridabad nung alirtem kanga anisüngzüktsü.

Noida aser Delhi na nungi airport tashi metro ajanga sendakteptsü aser Yamuna Expressway, Western Peripheral Expressway, Eastern Peripheral Expressway aser Delhi-Mumbai Expressway ama highways aika iba airport den sendakteptsü.

## Election aliba agi sorkari aluyimba ozüngtem agien: Sharad Pawar

**Satara, November 25 (Agencies):** Nationalist Congress Party (NCP) tongti lenir, Sharad Pawar-i, kobi melii state kar nung assembly elections agitsü aliba agi Centre sorkari aluyimba ozüng asem agientsü telemtetba agi, ta metetdaksü.

Satara nung osangbenertem den jembidang Pawar-i, "Uttar Pradesh aser kidanger linüktem nung elections agitsü. Osang angazükba agi, sorkar nung alirtem item states nung yimtsüng kar semdanga metetpelaa liasü. Iba nungji ajemdaker parnoki vote junga mangutsü ta metet, ibayongji sorkari iba telemtetba ya agi asütsüa akok," ta metetdaksü.

"Item state nung assembly elections agitsü mapang ana nung mali asü nungbo sorkari iba telemtetba magila," ta paisa shisem.

NCP lenirisa, Parliament nung item bill asem magizükdangyongi sorkari state tem aser aluyimertem den tama jemi asü nungbo tanü yamai majangshila. Iba onük ya state dak sendakba

onük lir, ajisiuka state tem den mejembii Centre sorkari indangindanga mera agia inyak, ibayongji Centre dang jashia liasü," ta ashi.

"Aluyimertem tarutsü tia atema telemtetba agitsü asoshi aluyimertem dang masüngdang, mesüra aluyimertem den mejembi, ta aluyimertem bilemer, ibayongji parnoki longkak ait tenzük aser tang tashi longkak aiter," ta paisa shisem.

Maharashtra nung NCP, Shiv Sena aser Congress teloktep-Maha Vikas Aghadi sorkar dak sendakba nung tasüngdangba ka langzüdang Pawar-i, "Maharashtra nung tang aliba sorkar ya kümsük küm pongu abensaa alitsü ta ni amanger. Parnok (MVA) longjemer election nung toktep nunga maneni parnoki takok angutsü," ta ashi.

Bodhbarnü Union Minister, Anurag Thakur-i, Ato kilonser leniba nung amenba Union Cabinet senden nung aluyimba ozüng asem agientsü atema inyakim renemogo, ta metetdakja liasü.

## Jaishankar leniba nung Russia, India, China (RIC) senden amentsü

**New Delhi, November 25 (Agencies):** Hokolbarnü India External Affairs Minister, S Jaishankar leniba nung 18buba Russia, India aser China (RIC) Foreign Ministers senden amentsü.

Digital video conference format nung amenba senden nung linük asem nungi Foreign Minister temi RIC amalitep atema jembitsü aser regional den

international onüktem nung o lemteptsü, ta Ministry of External Affairs-i sangdong ka ajanga metetdaksü.

Yaküm September ita nung Russia yimtiba, Moscow nung RIC Foreign Ministers senden amenba sülen India-i RIC menden mapa agizüka liasü. Yamaji Hokolbarnü RIC senden amenba sülen China Foreign Minister-i RIC menden agizüktsü.



Mumbai, November 26, 2021: 2008 küm kiralongrartemi Mumai nung aliba Taj Mahal Palace hotel amakba sülen asüng (November 26) küm 13 ajungtsü lia Brihostibarnü raliwalirtemi iba tesem semdangba noksa nung angur.

**GOVERNMENT OF NAGALAND**  
**DIRECTORATE OF EMPLOYMENT, SKILL DEVELOPMENT & ENTREPRENEURSHIP**  
**NAGALAND: KOHIMA**

*Govt. I.T.I 97th TRADE TEST RESULT* *Dated Kohima, the 25th Nov' 2021*

NO.DET-7/20/2001 (Vol-VI):675 The result of the 97th Trade Test under **SCVT** held in the month of October, 2021 at Government Industrial Training Institutes, Kohima, Dimapur, Kiphire, Mokokchung, Mon, Phek, Tuensang, Wokha & Zunheboto is hereby declared and the Roll Numbers of successful Candidates are given below: -

Govt. ITI	Pattern	SCVT	Roll Numbers
1. Kohima	Annual (1 year)	SCVT	<b>Km-</b> 01, 02, 03, 04, 05, 06, 07, 08, 09, 10, 11, 12, 13, 14, 15, 16, 17, 18, 19, 20, 21, 22, 23, 24, 25, 26, 27, 28, 29, 30, 31, 32, 33, 35, 36, 37, 38, 39, 40, 41, 42, 43, 44, 45, 46, 47, 48, 49, 50, 51, 52, 53, 54, 55, 56, 57, 58, 59, 61, 62, 63, 64, 65, 66, 67, 68, 69, 70, 71, 72, 73, 74, 75, 76, 77, 78, 79, 80, 81, 82, 83, 84, 85, 86, 87, 88, 89, 90, 91, 92, 93, 94, 95, 96, 97, 98, 99, 100, 101, 102, 103, 104, 105, 106, 107, 108,
	Annual (1 year) Repeater	SCVT	<b>Km-</b> 93R1
	Annual (2 <sup>nd</sup> year)	SCVT	<b>Km-</b> 115, 116, 117, 118, 119, 120.
	Annual (1 year) (Private)	SCVT	<b>Km-</b> 02P
2. Dimapur	Annual (1 year)	SCVT	<b>Dm-</b> 01, 02, 04, 05, 06, 07, 08, 09.
3. Kiphire	Annual (1 year)	SCVT	<b>Kp-</b> 01, 02, 03, 04, 05, 06, 07, 08, 09, 10, 11, 12, 14, 15, 16, 17, 18, 20, 21, 22, 23, 24, 25, 26, 27, 29, 30, 31, 32, 33, 34, 35, 36, 37, 38, 39, 40, 41, 42
	Annual (1 year)	SCVT	<b>Mk-</b> 01
4. Mokokchung	Annual (1 <sup>st</sup> year)	SCVT	<b>Mk-</b> 03, 04, 05, 06, 07, 08, 09, 10, 11,
	Annual (1 <sup>st</sup> year) Repeater	SCVT	<b>Mk-</b> 24R1, 26R1, 29R1, 30R1, 32R1, 35R1, 36R1, 37R1,
	Annual (2 <sup>nd</sup> year)	SCVT	<b>Mk-</b> 01, 02, 03, 04, 05, 06, 07, 08, 09, 10, 11, 12, 13, 14, 15, 16, 17, 18, 19, 23, 24, 25, 26, 27, 28, 29, 30, 31, 32, 33, 34, 35, 36, 37, 38.
	Annual (Private)	SCVT	<b>Mk-</b> 01P (1 <sup>st</sup> year), 01P (2 <sup>nd</sup> year).
5. Mon	Annual (1 year)	SCVT	<b>Mn-</b> 01, 02, 03, 04, 05, 06, 07, 08, 09, 10, 11, 12, 13, 14, 15, 16, 17, 18, 19, 20, 21, 22, 23, 24, 25, 26, 27, 28, 29, 30, 31, 32,
	Annual (1 <sup>st</sup> year)	SCVT	<b>Mn-</b> 33, 34, 36, 37, 38,
	Annual (2 <sup>nd</sup> year)	SCVT	<b>Mn-</b> 46, 47, 48, 49
	Annual (1 year) Repeater	SCVT	<b>Mn-</b> 35R1, 46R1, 47R1, 48R1, 49R1
6. Phek	Annual (1 year)	SCVT	<b>Pk-</b> 01, 02, 03, 04, 05, 06, 07, 08.
	Annual (1 year)	SCVT	<b>Ts-</b> 01, 02, 03, 04, 05, 06, 07, 08, 09, 10, 12, 21, 22, 23, 24, 25, 26.
7. Tuensang	Annual (1 <sup>st</sup> year)	SCVT	<b>Ts-</b> 13, 14, 15, 16, 17, 18, 19, 20.
	Annual (2 <sup>nd</sup> year)	SCVT	<b>Ts-</b> 15, 16, 17, 18, 19, 20, 21.
8. Wokha	Annual (1 year)	SCVT	<b>Wk-</b> 01, 02, 03, 04, 05, 06, 07, 08, 09, 10, 11.
	Annual (2 <sup>nd</sup> year)	SCVT	<b>Wk-</b> 18, 19, 20, 21
9. Zunheboto	Annual (1 year)	SCVT	<b>Zn-</b> 01, 02, 03, 04, 05, 06, 07, 08
	Annual (1 year) Repeater	SCVT	<b>Zn-</b> 12R1, 13R1, 14R1, 15R1.

**Note:**  
 1. Marksheet, Certificate, etc, for passed candidates will be issued from respective Industrial Training Institute, w.e.f 17th December, 2021  
 2. For detail information candidates may contact their respective ITI.

**(CHIDEN YADEN)**  
Director

*Issued by DIPR*

## Saif Gaddafi election nung tokteptsü metemsü: Election Commission



Saif al-Islam Gaddafi

**Tripoli, Yimpoksüi/Nov. 25 (Agencies):** December ita linük nung tir election agitsü aliba nung taoba yimsüsür Muammar Gaddafi'er jabaso Saif al-Islam Gaddafi tokteptsü metemsü, ta Libya indang election commission ajanga metetdaksü.

Candidate 25 tashi election nung shilem agitsü metemsü ta Bodhbarnü commission ajanga sangdongba nung Gaddafi ya densema lir, saka tatemsa judiciary ajanga obendang agütsütsü. Libya nung nisung 98-i linük tir atema tokteptsü asoshi tenüing agüja liasü.

Tripoli nung aliba military prosecutor temi commission

dang Gaddafi ya election nung shilem magidaksütsü ajungshia aru, kechiaser 2011 küm tebu yimsüsüba menden nungi atsüngdoksü atema nübürtem nokdaker den raraba nung pa shilem agiba ken o nung 2015 küm pa meliaka rara mapang mapa tamajung inyak, ta aija liasü.

Iba mapang Gaddafi ya okadak videolink ajanga Zintan nungi dena liasü, kechiaser pa tebu atsüngdokba sülen pa Libya nungi jena aotsü merangba mapang sepaitemi pa yangji pua ayu. Saka pai aibelen mapa meinyak, ta ashi.

Ano ajaki kanga junga meteta alir candidate ana, Ali

Zeidan aser Nouri Abusahmani na züingdokogo.

Election ozüing nung mangatetep aliba aser December 24 nü vote agütsütsü aliba indang tamendak dak ozüingtem aser shiba nokdaksü temsüa lir, ta asüba amala tatsütep ajanga alimai busema aliba yimjung maparen raksatsü amai ajiteter.

Tamalen election nung tokteptsü commission ajanga melaba candidate kar parnok anemeri aibelen mapa inyakba tai tonglokja lir.

Mapang tatsüka atema tang ato kilonser inyaka alisang Abdul Hamid Dbeibah-i tir atema metokteptsü nangzüka lir aser election ozüing nung shia aliba ama election agitsü ita asem lia menden azüingtsütsü aliba mapa pai meinyak.

Ano anüdoklen nungi taoba mapang mitkar tanishir inyaka alisang Khalifa Haftar ya candidate tejangja ka lir, saka pa United States senso agir lir, nungji shilem magitetsü. Libya anüolen alir aikati 2019-20 nung Tripoli amakdang pai mapa tamajung inyak, ta aitsür.

Haftar-i raraba mapang mapa tamajung meinyak aser US senso masü, ta ashir.

Parliamentary speaker Aguila Saleh-i September ita agütsüba election temzüing nung aibelen lir, ta Dbeibah-i ashir. Aguila Saleh ya tir atema tokteptsü tenüing agüja lir.

## Sweden ato kilonser shimteter ghonda ishika lir mapa yutsü

**Stockholm, Yimpoksüi/Nov. 25 (Agencies):** Sweden nung tetsürtem rongnungi ato kilonser mezüingbuba aser Social Democrat lenir Magdalena Andersson ya iba menden atema shimteter ghonda 12 mejungi lia Green Party-i party ana teloktep nungi pilaba sülen ato kilonser menden nungi anena yimtenren mejangjaba tia ka nung yutsür.

Saka Andersson-i parliament indang speaker dang party ka kijai akumba sorkar anitsü asoshi maneni ato kilonser shimtsü imlar ta shiogo, ta ashi.

Parliament-i coalition indang budget bill magizükba sülen Green Party ya iba teloktep nungi ainshia liasü.

"Ni speaker dang ato kilonser ka ama kü mapa nungi anisüngzük agütsütsü asüngdangogo. Party ka kija Social Democrat sorkar nung ato kilonser inyaksü ni renema lir," ta Andersson-i osangbener senden ka nung ashi.

Parliament nung ano vote tasen agitepra la yaritsü, ta Green Party ajanga shiogo, saka Centre Party-i shilem magitsü nangzük, aser kasaji la ato kilonser atema vote agiba

nunga shilem magi. Left Party-ia la nungitsü shiogo.

Sorkar indang budget benokba ya magizüki right-wing populist Sweden Democrats densema opposition ajanga benokba ka ang agizüka liasü. Sweden nung party tulutiba jenjang tasembuba nung aliba Sweden Democrats ya neo-Nazi movement nung tera yangloka lir. Budget atema vote agütsütepba nung opposition indang budget busema vote 154-143 agütsü.

Tensa indang jembishinütsü asoshi Sweden nung party ti lenirtem den jembitsü, ta speaker Andreas Norlen-i ashi. Züingsem 349 aliba parliament taruba mera pai Bresthostibarnü sangdongtsü.

Party kati sorkar yutsütsü molungtetra teloktep sorkar anentsüla, ta Andersson-i ashi. Parliament nung tensa memelenshi ta jangja liaka tanaben merangdangtsüla.

Tang agizüka aliba budget ya sorkar indang budget nung amendaka lir, saka temelenshi balala atema sorkari sen 74 billion kronor (\$8.2bn) indoknüba nungi taruba küm sen 20 billion kronor (\$2.2bn) dang tanaben lemstütsü, ta

Swedish broadcaster SVT ajanga ashi.

Tang agizüka aliba budget ya saru ajemtsü, police nem itasen timba agütsütsü aser Sweden indang judiciary system kübok sector balala nem sen tali agütsütsü nükjidong lir.

Andersson ato kilonser inyaksü shimteter ajanga Sweden nung alizüing ka tongteta liasü, kechiaser Europe nung tetsür-tebur tsüngta telemsa mali ta züingshiba linük ka nung tetsür kata yimtenren nung tekolakba inyaka meliasü.

Stefan Lofven-i küm tetenzüklen party lenir aser ato kilonser menden yutsüba sülen Andersson-i melenzüka liasü.

Parliament nung Andersson busema yimten yimsüsür 117-i vote agütsü, la ato kilonser shimtsü memolunger nisung 174 liasü, nisung 57-i vote magütsü aser ka maden.

Swedish Constitution kübok ozüing yanglur tajemba agi nisung 175-i anema menokdakra ato kilonser shimteta yimsü sütettsü.

Sweden nung general election ya taruba küm September 11 nü agitsü lir.

## MULUNGNEN O



ASO:  
23.03.1970

ASÜ:  
21.11.2021

Onoki kanga meima alila asür **Sütsüngtula** (Ungma), shiranga aliba mapang aser la iba lima nungi pilar onok mangyim jashi nung alidang kija, kibong lokti balala, Arogo aser kiyonger shirnokisa sarasadem, nübu aser rongsen agi onok nungita yaritepogo, nenok ajak dang kinüngertemi kanga pelaba metetdaksür. Nenok temeim mapa asoshi Tsüingremi maneni moajangma.

*Temeim Kinungbo aser Kinungertem*

### OFFICE OF THE KOHIMA MONGSENYIMTI SENSO TELONGJEM KOHIMA- 797112, NAGALAND KONANG TETUSHI AGÜTSÜR

Mongsenyimti Senso Sojasor **Wabong I. Meyionen Jamir**, Nagaland Sorkar tenzüka wadang nung apet asong tarak maket aser Hon Dokma (Governor's gold Medal) angusang Department nung tematiba menden IGP and Director tashi inyaker anisüngzük ngur lia Nagaland Sorkar-i ano pa nübo aginüa Nagaland Information Commission nung Chief Information Commissioner inyaksü shimteter nung Kohima Mongsenyimti Senso Office aser Lanu Ain nati Sorkar tongti ketdangsür tem dang kanga pelar aser asen lenir nem akhüm tetushi agütsür.

Maneni Sorkar tenzüka mapa nung meranga aser nendaka inyaker Mongsenyimti Anük apang tajung **Wb. Sentiyanger Pongen**, NSS Additional Secretary, Government of Nagaland, jenjangi ajungketba aser Senso tajung **Wb. Imliaküm Jamir**, NSS Deputy Secretary, Government of Nagaland, jenjangi atuba asoshi asen teyanglur Tsüingrem tenüngsanga Senso ajaki nenok takok madak pelaoker.

Tarutsü anogotem nunga Tulusang Tsüingremi nenok tenzüba wadang nung len ania taküm anema aliba den arishi talang moajang ta sarasademtsür.

Sd/-  
**(IMSUMANEN OZUKUM)**  
President, KMST

Sd/-  
**(LIPOKAKUM JAMIR)**  
General Secretary, KMST

## Somalia yimtiba nung bomb tesashi ka apok, asü-amar liasü

**Mogadishu, Yimpoksüi/Nov. 25 (Agencies):** Somalia yimtiba, Mogadishu nung United Nations security convoy ka nung tenük yoker gari ka nung bomb inoker pokdaksüba lendong nung nisung ti asü aser school tanur densema nisung 17 yiru, ta ketdangsürtem aser tenük kuli alirtemi ashi.

Al-Shabab telungpur teloki tenüing agiba bomb lendong tesashi ya Bresthostibarnep ataloka liasü aser anüngleni mokozü tulu atu. Lendong atalokba tesem anasa prangbong ola angashi, ta yangji alirtemi ashi.

"Onüki züingdangba nung asür nisung ti aser school tanur 13 densema dangar 17 yirua liasü," ta police odongtar Abdifatah Aden Hassan-i osangbener dang ashi. Pai ashiba agi, takum bendanga agütsür bomb pokloktsür ka SUV (gari) ka sünga tapoktsü oset bener arua UN security convoy dak tenük yoker pokloktsü.

Aamin Ambulance service ajanga lendong atalokba tesem nungi nisung 23 anizüker ao, shirnok yirur liasü, ta iba service indang director Abdikadir Abdirahman-i osangbener dang ashi. Iba lendong nung asür mesüra yirur alirtem rongnung UN personnel dena ali maliar mejangja, shirnok school ka anasa ajanga aoba bomb ya pokdakja liasü.

UN ketdangsürtem nunga tang tashi ola adoka mali.

Al-Shabab indang military operation odongtar Abdiasis Abu

Musab-i iba lendong ya par teloki agütsü, ta ashi.

Mogadishu tiyong nung K4 lemjem anasa bomb apokba ya kanga tesashi liasü, anungji anasa Mucassar primary aser secondary school indang jara lao. Gari aika kangasa mejungi raksa.

Lendong atalokba anasa Osman Hospital nung nurse Mohamed Hussein-i ashiba agi, tsüngbang temzüka aluba agi pa nembanger aliba atsütet.

"Onok inyakba mozüki jara lao. Onok jakdang school ka lir aser ajia lao. Nisung kwi asiär ni memetet," ta pai ashi.

Bomb apokba agi aoksatsür alinung ano prangbong ola agi kecha mangashie akum, ta pai osangbener dang ashi.

Al-Shabab yagi Islamic law tesashi amshia yimsü asütsü meranga Somalia indang central sorkar den küm aika rara arur.

Iba telok yagi mapang shia Somalia nung bomb aser prangbong lendong agütsür aser Somalia mitkar aser sorkar yariba African Union-mandated AMISOM force den rarar.

Al-Qaeda telungpur telok den sendaktepa aliba telok yagi sangdong ka nung, Bresthostibarnü lendong ya African Union peacekeeping convoy ajanga meiner aoba anüolen linük nungi ketdangsür dak tenük yoker agütsü, ta ashi.

Iba peacekeeping force ya linük nungi ainshitsü liasü, saka Somalia sepaitem tashi maitba ajiteta tang tashi par mission atsülanga lir.

## NISHTHA project-i Nagaland sorkar den maneni longjemer inyaktsü

**Dimapur, Yimpoksüi/ November 25, 2021 (TYO):** World Toilet Day (November 18) anogomung nungtem nung, U.S. Agency for International Development (USAID) ajanga nungittba aser Jhpiego ajanga mapa kuma inyakba NISHTHA, (health system strengthening project tongti) den Unilever longjemer Nagaland nung tzu temeruk ajemba inyakyim aser nuber anema alibaren ajungkettsütsü mapatong nungittsu atema tenangzüktep agiogo.

Ayushman Bharat kubok 'Health and Wellness Centres' sabang nungitta, USAID indang NISHTHA program-i metzümeshidak (toilet) shitak amshiba aser nuber anema alitsü asoshi tzu temeruk ajemba/jana timi indoktsü indang tongtibangtem rajema/ metetta lidaktsütsü asoshi lokti maneni ajungshitsü.

Tzu temeruk agütsütsü, merükmejuba aser temang anema alitsü maparen (services) timba akümba ajanga lokti anema alitsü asoshi USAID-i India Sorkar den longjemer inyaker.

Item services, talisa Family Welfare, Nagaland, Pangnyu Phom-i, "Metsümeshidak (toilet) timba amshitsü atema osang lemsatepba, tekümdangtsü sangdongba aser mapa agi inyaka sayuba ajanga nuber ajungmesoa aser parnok nem angatetdaksütsü asoshi yaritsü akok. Tzu temeruk agütsütsü aser merükmejuba alitsü asoshi Sorkar, lokti tentet balala aser private sector tsungda tesendaktep tajung alitsü nungdaker. Merükmejuba inyakyim ajungkettsütsü aser primary healthcare facility tajungba melenshitsu asoshi onoki USAID-NISHTHA aser Unilever den longjemer inyaker," ta shisem.

Nagaland atema USAID indang mapatong tem metetdaksüba mapang, USAID/India, Mission Director, Veena Reddy-i, "Anema alitsü asoshi inyakyim akangshidaktsütsü sentong' ka ama, manemer anepaluba inyakyim jenjang ajungkettsütsü asoshi primary healthcare facility nung tzu temeruk aser metsümeshidak tajungba melenshitsu asoshi USAID indang NISHTHA project-i Nagaland sorkar den maneni longjemer inyakdar. Tzu temeruk peria anguba den metsümeshidak shidak aliba, merükmejuba inyakyim benshiba aser tzu arulen lenmang shitak achayangra, lokti anema alitsü asoshi item inyakyim tongtibang asütsü ta onoki bilemer," ta ashi.

Minister of Health and

Family Welfare, Nagaland, Pangnyu Phom-i, "Metsümeshidak (toilet) timba amshitsü atema osang lemsatepba, tekümdangtsü sangdongba aser mapa agi inyaka sayuba ajanga nuber ajungmesoa aser parnok nem angatetdaksütsü asoshi yaritsü akok. Tzu temeruk agütsütsü aser merükmejuba alitsü asoshi Sorkar, lokti tentet balala aser private sector tsungda tesendaktep tajung alitsü nungdaker. Merükmejuba inyakyim ajungkettsütsü aser primary healthcare facility tajungba melenshitsu asoshi onoki USAID-NISHTHA aser Unilever den longjemer inyaker," ta shisem.

Yimtsung nung 'water supply' aser 'sanitation system' atema Nagaland-i 'community mobilization program' tajung yanglua lir. Iba den bendenloksema, State ajunga nung 'Health & Wellness Centers' ajanga nuber dang merükmejuba indang tongtibangtem aser ibaji ajanga anema alibaren osang sangdongtsü asoshi tongti shilem agidar.

## Jakhama nung awareness sentong ka ayongzük

**Jakhama, Yimpoksüi/ November 25, 2021 (TYO):** India nüjisor ngur küm 75 ajungba nungtem nung, Mongolbarnü St. Joseph's College Jakhama nung Nagaland State AIDS Control Society (NSACS) ajanga awareness sentong ka ayongzükka liasü, ta sangdong ajanga metetdaksü.

National AIDS Control Organisation, Ministry of

Health and Family Welfare Govt. of India akhüm nung 'Human Immunodeficiency Virus (HIV), Tuberculosis (TB) aser Blood Donation' nung iba sentong agiogo.

Iba sentong nung, District AIDS Prevention aser Control Unit (DAPCU) Kohima, District Program Officer, Sentimongla Tzudiri, HIV/AIDS tashidak nokdangtsü, iba tashidak

ajanga temang nung timtem agütsüba aser iba tashidak anepaluba indang nung jembia liasü.

Dr. Akaba Jamir District TB Officer aser Avilie Sekhose Assistant Director (SIMU) NSACS nati TB Mukh Bharat Abhiyan aser azü tenlaba (Blood Donation) indang tongtibangtem nung jembio, ta kasa sangdong nung shia lir.

## Wokha nung '16 Days of Activism against Gender-based Violence' campaign tenzükogo

**Wokha, Yimpoksüi/ November 25, 2021 (TYO):** 'International Day Against Elimination of Violence Against Women' anogomung bilemetta, Brehostibarnü Deputy Commissioner's Conference Hall, Wokha nung "End Violence against Women Now" omen kubok '16 day activism against gender based violence' campaign tenzükja liasü, ta sangdong ajanga metetdaksü.

Iba campaign tenzükba sentong nung, SDO (C), Wokha, Selemla S. Sangtam menden liasü. Sangtam-i, iba campaign ya küm shia ayonga agiba sentong ka lir aser 16 day activism campaign mapang Mahila Shakti Kendra, Saki-One Stop Centre nungi team balalai aser volunteer temi kilen shia semdangtsü aser tetsür anema mapa tamajung inyakba anentsü asoshi nuber dang tekümdangtsü osang

sangoktsütsü aser iba indang metetta lidaktsütsü asoshi pamphlets/leaflets lema agütsütsü, ta ashi.

Iba campaign ya December 10, 2021 nü International Human Rights Day sentong den külemi tembangtsü, ta Sangtam-i metetdaksü.

Central Administrator, Sakhi-One Stop Centre (OSC), Renthunglo Kikon-i, OSC Office koba District Hospital telungtet nung lir, iba Office nung maparen inyakdar aser timtem nung alir tetsür tanur aser tetsür tem aser kidang/ kibong nung timtem ajururtem aser tanga mapa tamajung inyakyim talisa tetsür dak azüapongba/shi nung medemtsü asoshi merenshiba aser tanurtem merenshiba benshiba nokdangtsü asoshi staff tem anibelem arema inyakdar, ta ashi.

Iba ama maparen/inakyim

kar (tetsür) dak danga atalokra OSC Office nung osang agütsütsüla, ajiasünungang mapang shitak nung timtem nung alirtem yaritettsü aser OSC-i angati counseling den tanga nungdakba agi yaritettsü akok, ta lai telok ayongzük, ta kasa sangdong nung shia lir.

Maneni, kasa anogo, United Nations den jangyumedema, Peren district nunga "End Violence Against Women Now!" omen nung ajemdaker '16 day activism against gender based violence' campaign tenzüktsüogo. Iba campaign ya December 10, 2021 tashi agitsü.

Iba sentong ya Peren Town Square nung district administration, Sakhi-One Stop Centre, Mahila Shakti Kendra den Pradhan Mantri Mantru Vandana Yojana longjemer tenzükja liasü, ta sangdong ka ajanga metetdaksü.

GOVERNMENT OF NAGALAND  
DIRECTORATE OF ART AND CULTURE  
NAGALAND : KOHIMA  
NO.AC/HF-2/2019 Dated Kohima the 24<sup>th</sup> Nov. 2021

### PRESS RELEASE

ART & CULTURE DEPARTMENT AT THE HORNBILL FESTIVAL 2021

The Department of Art & Culture is all set for the Hornbill Festival 2021 to present:

1. Daily Cultural Performances at the main arena. Cultural Troupes from all 17 tribes within State will be arriving soon to showcase their lively songs and dances in their colourful traditional attires..
2. The Artists' Corner at the World War-II Museum Premises, Kisama will have display and sale of art works, demonstrative arts etc.
3. The Archives' Exhibition will showcase collection of selected historical documents from Public and Private Records with reading facilities for interested Students, Scholars and Researchers and Sale of Departmental Publications at World War-II Complex.
4. A must visit place to see, understand and experience the historic event is the World War - II Museum, Kisama, where outstanding relics and artifacts are on display. The Museum will be opened to the public from 10:00 AM to 4:00 PM.

Come and experience the colorful Naga Cultural Heritage.

Sd/-  
**ADELA MOA**  
Director  
Art and Culture,  
Nagaland, Kohima



## Kohima Ongpangkongtsür Telongjem



Anogo : **30<sup>th</sup> NOVEMBER 2021**

Mapang : **11:00 AM**

Tesentepdak : **MOLU KI**

“ *Jangyumedemshi* ”

Tongti O Jembir

**DR. AOKUMLA WALLING**

Asst. Professor,  
Nagaland University, Kohima Campus.

*Sentong Tansen*

Jubilee Sentong Lapokba : **Kohima Mangmetonglar Telongjem**

Shilua Bilemettba : **Wt. Tiakala**

Menden : **Ketdangpur**

Lai zünga Sarasademsü : **Rev. Yashila Jamir,**  
Associate Pastor, Women, KABA

OWM Naklo Ken : **Kohima Alibalar Telongjem**

Nungo Kaket Saya : **Wt. S. Nükshirenla**  
Convenor, Jubilee Souvenir Committee

Tetushi Tejaoker O : **Wb. Alemtemshi Jamir, IAS (Rtd)**  
Chief Executive Officer,  
Investment & Development  
Authority of Nagaland (IDAN),  
Government of Nagaland

Jubilee Ken : **Kohima Chungtiatsür Telongjem**

Tepela O : **• Dr. I. Bendangla Longkumer**  
(5 minutes)

**• Wb. Jongpogtoshi, Tir,**  
**Kohima Ongpangkong Telongjem**  
(5 minutes)

Sabaliba Ken : **Kohima Longmisatsür Telongjem**

“Jangyumedemshi” : **Dr. Aokumla Walling,**  
Asst. Professor,  
Nagaland University, Kohima

Resolution Committee Osang : **Convenor**

Melepzung O : **Wt. Imtisungla,**  
Convenor, Jubilee Planning committee

*Jubilee Shibangba*

Tatem Sarasadem : **Wb. Temjen Sempo, Pastor, KABA**

## 18buba All Nagaland Inter District Volleyball Tournament 2021

## Mokokchung aser Kohima nati takok angu



18buba All Nagaland Inter District Volleyball Tournament 2021 - men's category & women's category nung takok angur tangokba noksa ka yangi angur.

**Kohima, Yimpoksüi/ November 25, 2021 (TYO):** 18buba All Nagaland Inter-District Volleyball Tournament 2021 (Men & Women) asayamung, koba Brehostibarnü tembang, iba asayamung nung 'Mokokchung' aser 'Kohima' nati men's aser women's category nung takok nguogo. Indira Gandhi Stadium, Kohima nung Nagaland Volleyball Association (NVA) akhüm nung Kohima District Volleyball Association (KDVA) ajanga iba asayamung ayongzüka liasü, ta sangdong ajanga metetdaksü.

Iba volleyball asayamung women's category nung Mokokchung district-i runner up title angu. Men's category nung Kohima district-i runner up jenjang ajangzüktet.

18buba All Nagaland Inter District Volleyball Tournament 2021 shibangba sentong nung, tetushi tesemdanger ama Youth Resources & Sports Nagaland, Deputy Director, Jakedovo Chase dena liasü.

Iba asayamung shibangba sentong nung KDVA president, Visasielie Suhu menden liasü aser NVA, Secretary Yanbemo

Humtsoe-i tepela anküp o jembi.

**\* 18buba All Nagaland Inter District Volleyball Tournament 2021 nung takok angurtem yamai alitsü:**

**- Individual winners:**  
(Women)  
Best Libero: Pursenla  
Best Setter: Chonreiphy Kashung  
Best Spiker: Rinrichon Shang  
(Men)  
Best Libero: Moasunep  
Best Setter: Sorilepziing  
Best Spiker: Tongpang Sunep

## Indonesia Open: Sindhu o Praneeth na quarter-i iogo

**Bali, Yimpoksüi/November 25, 2021 (Agencies):** Brehostibarnü, Indonesia Open Super 1000 asayamung tanabuba round nung PV Sindhu aser B Sai Praneeth naprongla pei pei tata asaya takok anguba sülen, quarterfinals tongogo. Ajisüaka, kasa round tebur kija asaya tanga ka nung külem India nung aser taoba champion Kidambi Srikanth tsükogö.

'\$850,000 event' tetsür kija tanabuba round asaya nung, Olympic medal anaben takok angur Sindhu-i, 21-12 21-18 agi world No. 26 Germany tsür Yvonne Li tsükdaksü. Sindhu-i ayong ayonga dang minute 37 nung iba asaya koktet.

Iba asayamung tetsür kija quarterfinal nung, world champion aser seed tasembuba Sindhu-i South Korea tsür Sim Yujin den asayatsü.

Tebur kija tanabuba round nung, Praneeth-i kanga dang meranga world no. 70 France nung Christo Popov den asaya liasü. Asayar ana tsüngda iba round set asem tashi asaya, kong Praneeth-i set tanabuba makokba dak alaka, pai mezüing aser tasembuba set takok angu. Quarter final tongtetsü atema, Praneeth-i 21-17 14-21 21-19 agi Popov tsükdaksü. Iba asaya ghonda ka ser minute 23 nung tembang.

Tang world No. 16 Praneeth-i Olympic champion

aser taoba world no 1 Denmark nung Viktor Axelsen den asayatsü.

Tebur kija tanabuba round asaya tanga ka nung, seed tanabuba Axelsen-i 21-14 21-18 agi Srikanth tsükdaksü.

Kasa asayamung tebur tarep tanabuba round asaya nung seed trokbuba India nung Satwiksairaj Rankireddy aser Chirag Shetty nati 21-15 19-21 23-21 agi Korea nung Kang Minhyuk aser Seo Seungjae tsükdaksü.

India nung tarep Satwiksairaj aser Chirag, shirnok doubles nung world no. 11 lir, tenati Malaysia nung Goh Sze Fei aser Nur Izzuddin den quarter asayatsü.

## Santosh Trophy NE Zone nung Nagaland asayatsü

**Kohima, Yimpoksüi/ November 25, 2021 (TYO):** Aruya aliba National Football Championship nung Santosh Trophy (North East Zone) atema Nagaland team-i shilem agitsü terenemba lir. Iba football asayamung ya Imphal, Manipur nung November 28, 2021 nungi tenzüka asayatsü, ta sangdong ajanga metetdaksü.

Main Stadium, Khuman Lampak, Imphal nung ayongtsü aliba football asayamung nung shilem agitsü asoshi Nagaland Football Association (NFA)-i State nungi asayar 22 aser official pezü shimogo.

Nagaland Team nungi asayartemji - Goalkeepers - James Kithan aser Neithovilie Chalieu; Defenders - Heping L, Lethokai Kuki, Puloka, Sanyem Konyak, Temjenwati Longkumer aser Thanglenngam Lunkim; Mid-fielders - Pursunep, Kakhevi Assumi,

Hivi Kiba, Khwetelhi Thoppi, Haotingmang Thomson, Limakumzuk Ao, Kevisanyu Peseyie aser Mughahuto Chishi den Forwards - Rhitso Mero, Shamba Samson Konyak, Laiwang Bohham aser Ngul Goulal nung asütsü.

Nagaland team atema coach Roko Angami, manager - Mughato Aye, assistant manager - Akihito Zhimo aser Team physio - Zakieletto nung asütsü.

Hokolbar anepdang 7:00 ako meta Nagaland team Dimapur nungi apusoa aotsü.

Nagaland-i match asem asayatsü, kong November 28, 2021 anepdang 9:30 meta Manipur den mezüing asayatsü. Iba sülen tanabuba match ya November 30 nikongdang 2:30 meta Mizoram aser tasembuba match ya December 2, 2021 anepdang 9:30 meta Tripura den asayatsü, ta sangdong nung shia lir.

## Tuensang nung 3buba Inter-Departmental Sports Meet tenzüko



Tuensang, Yimpoksüi/November 25, 2021: 3buba Inter-Departmental Sports Meet 2021 lapokba sentong nung Superintendent of Police Tuensang, Vishal Chauhan, IPS-i telok den jembiba noksa nung angur.

**Tuensang, Yimpoksüi/ November 25, 2021 (TYO):** Brehostibarnü, Indoor Badminton Stadium Tuensang nung 3buba Inter-Departmental Sports Meet 2021 tenzüko. Iba Sports Meet lapokba sentong nung Superintendent of Police Tuensang, Vishal Chauhan, alakteta tejaoker ama metetdaksü.

Tuensang - 3buba Inter-Departmental Sports Meet 2021 nung Table Tennis, Badminton aser Carrom asayatsü, kong Department 40 agi shilem agidar.

Iba ama asayamung ayongba atema SP, Vishal-i Meet tayonger dang pelaba metetdaksü.

Timtem tensa aser tamajung ajak amadoktsü; aser ajak longjemtsü asoshi Saisapong ya sabang ka asütsü, ta pai ashi.

Iba asayamung pela agizükdi aser Department tsüngda tesendaktep tajungba yangludi, ta pai shisem.

Organizing Committee Member, Er. Akhangjongshi-i telok pela agizük aser iba sentong nung Moasenla menden liasü. Chief Referee ajanga iba Sports Meet nung shilem agitsüpur tem tenangzüktep agiba ketdangüsü agi aser Tsüngremer temoatsü meshizüka Tenyimi Church Tuensang, Pastor, Sentilo Sebi sarasademtsü, ta kasa sangdong nung shia lir.

**BILEMDANGANG**

**"Meranga inyaker mekokra kecha tesasa mali."**